

# 常 談

## 目 要

- 插圖八幅
- 對於國民大會延期之雜感
- 粵設行政督察專員及其制度之史的研究
- 比利時中立問題與歐洲局勢
- 為提倡親俄論者進一言
- 華北政權之推移
- 支那動亂之原因
- 對中日交涉所望於蔣介石者
- 哀到處被逐之難僑
- 國民政府之法幣政策
- 法郎貶值之原因及其影響
- 英國所得稅之內容與沿革
- 讀史隨記
- 最近國內外大事記略
- 海潮庵隨筆

藏書 國立北平圖書館

## 第一卷

## 第七期

中華民國二十五年十二月一日出版

第一卷 第七期

常 談 月 刊

中華民國二十五年十二月一日出版

# 常談月刊第七期目錄

民國二十五年十二月一日發行

西班牙美麗之建築攝影現已毀于內戰	幅
美總統勞斯福復選勝利後造像	幅
英國每小時可飛行三百英里之新戰機	幅
松岡洋右及其二子	幅
美國婦女學習弓矢攝影	幅
美國新政之大本營	幅
俄國外長李維諾夫近照	幅
法總理李昂伯倫近影	幅

## 論壇

對於國民大會延期之雜感	天馬	(一)
粵設行政督察專員及其制度之史的研究	忍盧	(一七)
比利時中立問題與歐洲局勢	六榕	(二七)
為提倡親俄論者進一言	蘭香	(三五)

## 外論介紹

華北政權之推移	須瀾	譯	(四三)
支那動亂之原因	瀧口堯	著	(五三)
對中日交涉所望於蔣介石者	先哲	譯	(五九)

## 時事論評

施孝女蒙特赦矣	(微波)	(六五)
---------	------	------

哀到處被逐之難僑	國民政府之法幣政策	聞有發明研究所之設而喜	化妝品漏卮之駭人	全國童子軍之成績	上海講求衛生之兩大組織	法郎貶值之原因及其影響
.....	.....	.....	.....	.....	.....	.....
(息夫)	(秋聲)	(位觀)	(沙因)	(釋之)	(思鄭)	(巴人)
(六九)	(七一)	(七三)	(七七)	(七九)	(八一)	(八五)

專載	英國所得稅之內容與沿革
.....	.....
潛翰	(八七)

談叢	讀史隨記	最近國內外大事紀畧
.....	.....	.....
牛郎	(一〇三)	記者
(一〇七)		

雜俎	海潮庵隨筆
.....	.....
曼殊	(一一五)

庭訓格言	之婚嫁
.....	.....
(一一九)	

華北中日通航	中英航空通航	開發華北將具體化	外蒙與蘇聯當局訂立協定	張學良聯俄
綏東各軍雲集	段祺瑞預立遺囑勸國人	財政部將再商食糧問題	中央撥款充安定桂省金融	
冀東教育廳公布實施教育方針	冀東銀行已正式成立	冀東成立水利委會	張外長與川越七次會談	
馬德里陷落	西國民軍如組政府英法決不承認	英政府建議保留海約第二十條	羅斯福總統新	
財政計劃	美總統擬發起國際和平會議	意相發表重要演說	奧國復辟匈國整軍	英意商約簽字
英國決出全力恢復國聯權威	德清黨紀念希特勒演說	日陸軍省對新預算決堅持新國防計劃		

# 創刊號要目

發刊詞  
救國只要認得三箇字  
對於所謂中俄提携論  
冀察政權與日本  
教育當以孔子爲主  
對憲法草案外論之感  
川粵鐵路與英國之關係  
不合理之財政經濟策  
國民政府之對俄外交  
華北赤匪工作之實況  
論語今義  
國內外大事紀略  
海潮庵隨筆  
是汝師錄



西 班 牙 美 麗 之 建 築 拓 影 現 已 及 于 內 戰



美 國 駐 菲 領 事 勞 斯 福 菲 選 勝 利 接 造 像



英 國 每 小 時 可 飛 三 百 三 十 里 之 新 戰 機



松 岡 洋 右 及 其 二 子



影畫矢弓習學女歸國美



寫本大之政新國美





照 近 夫 諾 維 李 長 外 國 俄



影 近 倫 伯 昂 李 理 總 法



## 論壇

### 對於國民大會延期之雜感

天馬

自國民黨專國十年 而內之民困日甚 外之國勢凌夷 其治國無狀 不獨黨外人有以攻之 即黨中人亦每發于良心 自承不諱 於是其黨之黠者知訓政謬說 必不足以維繫人心 乃見風轉舵 卽利用全國渴望立憲之心理 再欲憑掛羊頭賣狗肉之騙術 愚弄天下 故在去年所謂國民黨第五次全國代表大會中 居然議決 定於本年十一月十二日召開國民大會 通過憲法草案 謂憲法一經國民大會通過而成立 訓政時期以此而終 卽憲政時期 以此而始 其言誠甜蜜而動聽也 當時國民黨中之未解個中用意 而對於政柄 熱心戀棧者 尙多悻悻然 誣吾國全民爲尙無享受憲法資格 而立憲立憲云者 原出于敵黨之要求 因極怪其本黨不察 墮人術中 以爲一旦放棄政權 未免示弱于敵人 而亦卽暴露本黨之無能 以是多有

倡爲反對論 紛紛向其中央請罷原議者 而中央以其不識錦囊中有妙計在 則亦笑而置之 而果於今年五月五日 由立法院通過憲法草案八章一百四十八條而公布之 並定以本年十一月十五日召集國民大會 其所訂國民大會組織法 及國民大會代表選舉法 一經公布 嗣又設立選舉總事務所 通令各省市籌辦選舉事務 並於南京趕建國民大會會場 一若像煞有介事者 此國民政府籌備立憲之第一幕也

夫吾全民以阿斗不才 受壓制于暴力之下而失自由者久矣 其以不得自由故 雖有夢想立憲國之如何如何 而爲之神往者乎 然考之萬國憲法史 多有以流血爲代價而後得之 蓋與虎謀皮 其勢逆也 乃今國民黨突然有此豪舉 殆所謂孤始願不及此 其視日本德川幕府之奉還大政 前清辛亥之推位讓國 殆無遜色者乎 吾儕小民 受寵若驚 宜乎舉國震動 如重囚之逢大赦 窮人之拾異寶 歡欣鼓舞以迎之 其有國民代表之選 以昔者國會議員老爺之往例推之 吾意必有攘臂疾呼 雄辯驚筵 不憚發表政見 以取悅于有選舉權之人 爭欲攫取一席以爲揚眉吐氣地者 夫何以至今未聞國中之有學識 有德望 平日關心國事之人 對於此次選舉 有何感動 其可供新聞紙館之材料者 祇有報道某等公民 如何烏合而作極滑稽之宣誓 其事殆與強人之念遺囑等 完全出于被動 僅能令識者竊笑耳 初不料國家至

重大之事 乃類兒戲若此 然此亦惟在都市作粉飾太平計 其稍僻遠 恐並此無聊之舉而亦無之 則所謂選舉 其真相殆疑莫能明焉 此國民政府立憲幻影戲之第二幕也

此次國民代表之選舉 通識之士 既認此爲國民黨朝三暮四 朝四暮三之術 孰肯甘爲芻狗 甘爲傀儡 故皆望望然去之 若將浼焉 則惟有欲借此以求富貴利達者 樂乎人棄我取 願爲之捧場焉 然聚羣犬而涎一骨 猶恐人之靳而不我與也 又不嫌暗中行其競爭手段以求之 據所傳聞 當各地之紛紛然辦理公民登記 及舉行預選也 或以爲苟能取得國民代表一席 將來中華民國之大總統 即可由我手上舉出 匪惟榮幸無比 且或如曹錕時代 更有所謂交換條件者 則又終南之捷徑也 夫既認爲前途有無限利益之生意經 自不惜爭出資本以圖一博 以此凡欲利用人一票選舉權者 日惟忙於請酒送禮 而被巴結者又視爲奇貨可居 不輕易相許 則一軒輊較量之間 而意外之收入豐矣 至於經手辦理選舉事務 又有藉此爲發財門路者 故有由省市縣政府 公然下令包辦 或竟用武力包圍選舉公所 出示被選人名單 脅迫區長鄉長簽字種種怪現象 不可勝紀也 且又因有圈定之制 則既入彀于初選者 尙不能不爭名於朝 於是六朝金粉之地 又忽現科舉時代 槐花黃 舉子忙之大觀 聞雙十節前數星期內 雖正值外交緊急 國難嚴重 而新都傳舍 陡然宣告客滿 酒樓飯店 亦

有山陰道上 應接不暇之勢 白牌之出租汽車 縱橫馳驟 這從何來 遽集於此 殆皆奔走於黨國要人之門 直接間接 輾轉相託 互爲交換 鬧個不了 據傳有一笑話 謂某要人受其同鄉候選人之請託 各皆求爲圈定 而以盡屬至親要戚 情無可却 顧又苦僧多粥少 無法一榜盡賜及弟 某要人窮於應付 忽然人急智生 乃大發請客帖 邀集凡來請託者於一堂 酒過數巡後 主人突起立向衆賓拱手而謝曰 「今日之事 假若我帮甲的忙 結果便會得罪于乙 帮乙的忙 則又無以對甲 我今細想 最好還是不帮任何人的忙」 此一席話 固足令舉座爲之噤然 而近者選舉競爭之劇 不已窺見一斑乎 乃當各候選人正在興高采烈 彈冠相慶之時 胡爲乎晴天霹靂 忽來一大煞風景之惡消息 其事則國民政府於十月十五日 突然在會議席上決議 關於國民大會代表選舉 各省市未能按照原定程限 依法辦竣 大會應延期舉行 一俟全國各地代表依法選出 即行定期召集 噫 國民大會竟延期矣 此國民政府預備立憲 正如幻影戲之演至緊要關頭 忽垂幕而宣告暫時停演 且無休息十分鐘之表示 其將爲無期之延期乎

夫國民大會代表之選舉 其汙濁黑暗 既如上述 以此而望能網羅國內之優秀分子 集於一堂 坐而論道 以制成奠定國基之大憲 爲國利 爲民福 是猶緣木而求魚也 其結果不

過於國計預算支出門 增加一巨額支出 且將造成一種新貴 不難假國民代表之美號 善者則藉以貪緣利祿 惡者則恃以作奸犯科 往年國會議員之歷史 可爲殷鑒 則國民大會之應有其名 而毫無實用者 與其搗亂於將來 曷若收束於半途 故今者國民大會之宣布延期 舉國直付之不議不論 可知國民之智識階級 早已透視黨人之倡言歸政 僅欲行假立憲以掩其專政時代之罪惡 斷無真正化黨爲國之誠意 語曰不誠無物 不觀於往年之國難會議乎 事到危急 手足無措 欲借一途 使人代爲分謗 以圖諉卸其誤國之責 而問其成績 則祇贏得若干議決案 束而置諸故紙堆中耳 鑒往知來 宜此次吾等公民 對於所謂國民大會者 其召集也聽之 其延期也亦聽之 殆皆視爲無關輕重者 此種怪象 尙徧考萬國立憲史而罕見其例也

國民大會 如果名符其實 確能舉出國內優秀分子 使爲真正代表 以共議國家大計 制定憲法 監督政府 而實現其主權在于全體國民者 則是立國之常規 救亡之要道 乃正吾全民所日夕渴望 志在必得者 何以今者國民黨自稱訓政之政府 忽而自動有此慷慨之舉 國民方當歡迎之不暇 而竟冷淡以答之 論情似甚矛盾 而不知其中實有種種破綻 破 而不甘墮其術中也 欲證吾言 且先就國民大會組織法及選舉法而一檢討之

夫既曰國民大會 卽五尺之童 亦能望文思義 而知其組織分子 必爲國民所公舉也 乃國民大會組織法 第二條規定 中國國民黨中央執行委員 中央監察委員 爲國民大會當然代表 此一不通也 第四條規定 左列人員得列席國民大會 (一) 中國國民黨候補中央執行委員 候補中央監察委員 (二) 國民政府主席 (三) 國民政府委員 (四) 國民政府各部院會之長官 (五) 國民大會主席團特許之人員 此更不通也 何以言之 國民黨之把持大權 夫既十易寒暑矣 使猶以喪權辱國爲未足 尙欲踞高位以播其惡 則長此局面繼續下去 起視全國 似尙無他黨能新植勢力 一時遽起而奪其席者 本可安心再橫行若干時 以待國民最後之裁判也 今既以一線之明 輒欲奉還大政 表示讓德 以消怨毒而博美名 則爲國民黨計 自宜直捷痛快 取消黨權高於一切之口號 使各個黨員 退而復就普通國民之列 爲其黨內人才 果盡優秀 千人俊而萬人傑 則斯人不出 如蒼生何 際此國民代表選舉之時 吾恐諸公欲高臥東山而人莫之許耳 何必於國民大會組織法中 特設第三條 預爲不可一世之諸公 留此一席 此非所以榮諸公也 實辱諸公耳 在國民黨中人 亦多認此條規定 爲顯示戀棧之痕迹 期期以爲不可者 而當時起草者不知以何用意 竟能藻周慮密 下此一着 以防肥水之外流 所謂苟患失之者非耶 顧經多少法律專家之研究討論

而莫敢更易主張 意者對於目前最有勢位之人 固不能不犧牲國民全體之權利之一大部 以爲諸公壽乎 至第四條規定 則更令人莫名其妙 所謂列席 其地位權限 絕無一言道及 嘗考各國之採用國會制者 中樞大員 每有列席 但限於報告政情 或解答議員之質問 舍此而外 不能越俎發言 今此條所設列席 若仍不外各國通例 則於第一暨第五兩類 以何因緣 而亦能參預 若爲吾國現時所有重要會議 列席者往往與出席者有同一之發言權 則與立憲精神 顯然違背 又設有大會主席團特許列席一類 毫無限制 則爲戲院之賣票而不對號者 吾隨時濫發 必至人頭擠擁 加櫓不已 倘或黨員老爺 屆時尙能不減其威風 則魚貫而入 孰敢道一不字 神聖會場 豈不變成五都之市耶 其開此方便之門 使非爲號召同黨 恃衆橫行 以將威脅真正之國民代表 吾誠不解其用意之所在也 又試就代表選舉法而考之 其第六條 國民大會代表之選舉 以無記名單記名法行之 其選舉票應載明國民政府所指定之候選人全體姓名 由選舉人就中圈定一人 第十三條 各選舉區所推選之候補人 由國民政府就中指定三倍於各該區應出之名額爲候選人（第二十二條第二十五條第二十八條皆有類此之規定）第十四條 省政府對於選舉區所推選之候選人 在呈報國民政府指定前 得簽註意見 第十五條各選舉該區應出之國民大會代表 由各該區有選舉權人 依第六



條之規定選舉之 由上述各條文而得其結論 則所謂選舉 實受政府之操縱指揮 而公民所以行使選舉權者 不過屬於掩飾天下耳目之一種形式 其內幕與洪憲時代籌安會之包辦選舉者將毋同 以是而談立憲 名與而實不與 其間有選舉國民代表之戲目 而欣欣然額手相慶 以爲從北可獲得立憲國民資格者 其亦可廢然返矣

又吾全民所期望于國民大會者不一 而開宗明義之第一章 殆莫切要於憲法之制定 顧或曰 吾國今者各省自治 尙未完成 仍應讓國民黨繼續訓政幾時 此國民黨厚誣吾民之響言 不足辯也 又或曰 吾民尙無守法習慣 而以有權勢威力者爲尤甚 縱有千萬極盡文章能事之條文 弱者守之 曾不足以拘束強者 則憲法云云 將復何用 此誠閱歷有得之言 然而有法終勝於無法 吾國民決不能因噎而廢食 且正可在憲法中 鑒于從前之成敗得失 制爲種種制度以防範之 此正立憲之可貴 而亦吾人所殷殷屬望也 顧制憲爲國命所寄 與其役者萬不容於率爾 今且就吾國制憲之沿革而述之 其導源在於前清末葉 當時外審天下之趨勢 內察全國之輿情 知非變法維新 不足以圖強自存 於是乃有憲法大綱及十九條條之宣布 惜受病已深 藥不及治 及由帝制一變而爲民國 於元年三月十一日公布中華民國臨時約法 旋又有中華民國憲法草案 卽天壇憲法草案 係於二年十月三十一日在起草委員會

三讀通過 至五月一日又公布中華民國約法 八年八月十二日憲法起草委員會 議決中華民國憲法草案 十二年十月十日復公布中華民國憲法 逮國民政府成立後 又於二十年六月日公布中華民國訓政時期約法 以上各種 論其性質 皆爲根本大法 其內容之優劣得失 今者皆已成爲疆石 無可復論 而卽此可見國民對於憲法之要求 未嘗間斷 自九一八事變以來 國民黨訓政之豐功偉烈 已足聳萬邦之觀聽 而爲吾四萬萬男女老少同胞所稱道弗衰 緣是國民黨鑒於各方面之紛紛勸退 知非用狙公手段 不足以解一時之圍也 乃於二十一年十二月第四屆之中全會在南京開會時 決定以民國二十四年三月召開國民大會 議決憲法 而同時立法院卽開始着手起草憲法 至二十三年九月十三日完成第一次草案 通過三讀 至二十四年十一月十二日開第五次全國代表大會時 討論憲法問題 議決兩項 (一)宣布憲法草案 及召集國民大會之日期 由大會授權于第五屆中央執行委員會決定之 (二)憲法草案由大會接受之 但應由第五屆執行委員會 根據大會通過之重要憲法各提案修正之 而五屆一中全會 旋即開會議決 於二十五年五月五日宣布憲法草案 十一月十二日召開國民大會 制定憲法 以上爲吾國憲法之畧歷 而此次所公布之草案 則固閱時三載 稿經七易 而後得之 立法院之勞 固不可沒也 雖然 立法院何爲而取得草憲權乎 國民黨人之言

曰：見諸孫中山之建國大綱第二十二條，其文爲憲法草案「當本於建國大綱及訓政憲法兩時期之成績，由立法院議訂，隨時宣傳於民衆，以備到時採擇施行」。此條本文根據何種法理，能否作爲金科玉律，今姑勿論。且又置其所謂訓政憲政兩時期之成績者於不問，假定以建國大綱中所稱立法院爲有權草憲，然今之立法院本身，早已違背建國大綱之規定，其委員又非直接或間接民選之代表，乃純乎爲由政府隨意任命之官吏，與其他官吏，身份無異，則何得以其官制上，偶然載有立法二字之頭銜，而遂貿貿然舉草憲之大體以屬之？若果今之立法院而能有草憲權，則各院當然可歸一例，下至各部會，或其他公私團體，又豈無對於法律尙有一知半解之人才，則何不各各令其提出一憲法草案，以備國民大會之採擇，不猶愈於今之非驢非馬，拉雜成篇者乎？否則國民黨一日尙未歸政以前，猶是黨權高於一切也。此次提前立憲，既屬國民黨之特惠，則何不更令中央黨部一手包辦而欽定之，則將來在國民大會中，所謂國民代表者，懾于積威，又感大德，夫孰敢不欽此欽遵，而認爲懸諸國門，一字必不敢易耶？如此，寧無勝于獨讓立法院之強奸民意耶？

或曰：此特草案耳，在未經國民大會通過以前，僅爲一未定之稿，不過聊備採擇，或供參考。如果國民代表，人人有淵博之學識，遠大之眼光，清晰之頭腦，公正之批評，而能順天

下之大勢。察目前之地位。於本國之歷史文化。風俗民情。社會現狀。經濟景況。盡能瞭然於胸中。而又絕不挾有絲毫黨見。以淆是非而亂黑白。則對此憲法草案。不妨可者可之。否者否之。甚至全部廢棄。舉以覆瓿。無不可也。此爲國民代表應有之權。當然無人能阻其行使。唯在積威政府監視之下。苟非具有大無畏精神。不爲威屈。而又不爲利誘。吾恐未必能有此快人快事也。以歷來所謂某某大會之成例推之。將見此等不滿人意。支離破碎之草案。自不難宣讀一過。即可獲全場一致之贊成。其最高明者。或於無關痛癢處。咬文嚼字。畧加推敲。已足盡制憲之能事矣。其於主義之標榜。根本之構造。權限之分配。責任之負擔。以至國士之如何保全。民權之如何保障。夫孰敢有犯無隱。盡量發揮。以逢人怒而蒙大不敬之罪乎。假令天下所鄭而重之曰制定憲法。制定憲法者。其程序不過若是。則欲問將來憲法之尊嚴如何。不得不先就草案之內容而探究之矣。

憲法草案。以立法院濟濟多才。又閱時三年。稿凡七易。僅乃成之。其用力之勤。吾人自當感佩。惜一經公布。讀者未敢諛爲佳本。在屬草者或以羣言淆亂。或因環境所限。以致不能確定主張。處處兼顧。矛盾之點。在所未免。吾人亦深諒之。原不欲吹毛求疵。但以憲法爲經緯一國之大文。一字出入。皆於國家前途有關。則又不許吾人忽畧讀過。惟欲從頭至尾。

逐細詳論 非有專著 莫暢其旨 今聊就時賢所論及者 畧述一二以發凡焉 其說如次

一 憲法草案未能確定目的 既欲標出理想 又欲顧到實境 故不免支離割裂 無一貫之主張

一 孫科曾言 「此草案實就總理遺教 國人論見及中央各同志主張 三者融合而成」 成分既

極複雜 而又無集大成之手段 使天衣無縫 故堆砌之下 難免矛盾與衝突

一 以五院制度 尙無一定解釋 此次立法院既無藍本可抄 又未能自立一貫之統系 使得成

爲一部有統系之法律 故只覺得東麟西爪 凌亂不堪

一 對於享受政權之國民大會 原應效法英國國會 使得享有無限職權 乃草案則將英國國會

所有之職權 分別賦予國民大會 及立法院監察院之機關 而使各有其一部 此種複雜制

度 將來必至窒礙難行

一 草案中多用負責字樣 爲規定總統立法院監察院 均對國民大會負其責任 而國民大會

即能罷免之 又如規定行政院長對總統負責 而總統亦能罷免之 此爲責任分明 乃獨於

規定司法考試兩院長 則亦同由總統任命 而却受國民大會之罷免 未免事出兩歧

一 既規定立法委員於院內之言論及表決 不負責任 而又同時規定立法院……對國民大會負

其責任 國民大會又可罷免立法委員 於監察委員之規定亦同 則其結果 非使立法委員

監察委員 失其言論自由之保障 而受國民大會之監督 即國民大會失其監督立法委員監察委員之能力

一國民大會是政權機關 不容受治權機關之約束 此爲最重要之原則 乃草案第三章 未曾申明此義 而止有中華民國之主權 屬於國民全體之規定 國民全體與國民大會 發生若何關係 又未明言 則令人無以認識中華民國主權之表現方法 未免過於疏忽

一國民大會無論是否爲主權所託寄 但屬於政權機關 絕不應受治權機關權力之約束 乃草案第三十五條則規定 國民大會之組織 國民代表之選舉罷免 及國民大會行使職權之程序 以法律定之 而於第一百三十九條則言憲法所稱之法律 謂經立法院通過 總統公布之法律 照此規定 則立法院所通過總統所公布之法律 即有約束國民大會之可能 例如創制及複法權之行使 高級官員之選舉及罷免 馴至國民大會本身之產生與組織 無一不受立法院及總統之約束矣 其流弊可勝言耶

一第一百四十二條規定 憲法之解釋 由司法院爲之 解釋憲法 何等重要 而草案於第七十六條規定 司法院爲中央政府行使司法權之最高機關 掌理民事刑事行政訴訟之審判及司法行政 對於解釋憲法之重要 却無一字提及

一國民大會所以代表民意 監督政府 職責何等重大 乃草案第三十一條規定 國民大會每三年由總統召集一次 會期一月 必要時得延長之 以此國家最重要之機關 而須俟三年之久 始得爲一月之開會 無以恭惟之 其留俟太平盛世時 作爲一種裝飾品可也 至同爲立法院所通過之國民大會組織法 將會期定爲十日至二十日 又與此法不符 則更謬矣 亦足見執事者之過於寫意也

一第八章第一百四十三條規定 立法委員監察委員 半數由國民大會選舉 半數由總統任命 不知所謂 不敢強解

一草案對於中央政府與地方政府之關係 未能詳爲規定 可見不明治國之要道

一第二十七條規定 每市縣及其同等區域 各選出代表一人 但其人口逾三十萬者 每增加五十萬人 增選代表一人 此爲明定選舉國民代表之標準 而按之國民代表選舉法則絕不以此爲依據 令人不解應設此條之用意

以上不過隨手拈來 其他予盾錯誤漏抵觸之點 不一不足 未遑一一爲之列舉 而此案之價值 已可見矣 將來幸而於提出國民大會時 偷冒牌之國民代表諸公 尙能察出謬誤 根本推翻 不使此等牽強傅會之拉雜條文 傳播留存于世 以爲中國羞 更進而本諸國民

全體之公意 以無偏無黨之態度 廣延天下之確有政治法律真正學識者 重與公開討論 別行制定 以正國是而饜民望 則固吾人日夕所馨香祈禱者也 夫如是 則此次國民大會之開會 爲有重大義意 今一旦忽又宣告延期 其藉口爲各省選舉尙未辦竣 而未聞更有嚴令催促 顯見國民黨尙貪弄權 未忍遽然釋手 而舉國盼望立憲之已久 又何以前者對於國民大會之召集 祇有冷眼旁觀 而現在聽其延期 且亦無所動心 此豈吾民盡是智識低下 不知政治爲何物哉 無乃知立憲爲假 猶古董商之飾其贗貨混作夏鼎商彝以求售 則凡出席國民大會 號稱有權制定憲法之國民代表 實乃等于署名騙人買賣契約上之見證人耳 宜識者之不以屑意也 抑以往事察之 黨人從來所發宣言 所呼口號 何一非字字珠璣 聲聲金石 而試問其有能兌現者乎 由是言之 則今者國民大會之延期 甚至無期延期 或者猶能爲國庫省得一筆無謂之支出 夫又何足惜邪



當今之世 醜必託善以自爲解

邪必蒙正以自爲辟 此使君子

小人紛然殺亂 莫知其是非也

（淮南子）

## 粵設行政督察專員及其制度之史的研究

忍 廬

吾國自辛亥革命以來 虛有統一之名 未舉統一之實 蓋因幅員廣大 殆若干倍於歐洲 而以彼多才 析爲數十國而分治之 猶未能悉臻上理 况我之自命中央政府者 德既無以服人 威又不能及遠 對於勢力所支配之一小範圍以外 自不免有鞭長莫及之感 緣是號令不行 省自爲政 其始終未與中央真正合作者 尤以廣東一省爲最 蓋在北京政府時代 黨人既屢借此革命策源地 以有非常之舉 而藉其地理財力之優越 足以負隅 逮國民政府成立 門戶雖屬一家 意見亦自紛歧 故兩者之間 仍不免貌合神離 其對於南京政令 有害則避 有利則趨 一切措施 獨行其是 自爲風氣 國民政府 未敢過問也 故在陳濟棠盤踞廣東七年間 粵省一切政制 多有與他省乖異者 自陳氏之軍事異動 不匝月而旋告失敗 於是粵局一變 中央命吏紛紛南下而主其政 則凡百規模 多已改弦易轍而更張 而其中最與地方行政有關者 則行政督察專員之設置是也

陳濟棠在廣東主持軍政時 在省政府轄治範圍內 分全省爲五區 一曰中區 二曰西北區

三曰東區 四曰南區 五曰瓊崖區 每區設一綏靖公署 置綏靖委員一人 以各軍長或高級武官兼任之 其權限名爲辦理區內各縣市剿匪事宜 而實則對於地方警衛隊 及民政建設各項 無一不可藉勢句辦 其職權往往與民政廳及縣政府 時有抵觸 混亂行政統系 莫此爲甚 故粵局底定之初 卽已決議將此各區綏靖公署 一律裁撤 限期結束 但以廣東地面遼闊 縣治百數 若專賴一省政府高拱於上 遙爲節制 卽難免耳目不周 照應莫及 故於廢除綏靖制度之後 卽又用偃武修文之意 依照南京政府頒行之法令 將全省九十七縣市局劃分爲九個行政督察區 其第一區 轄番禺 南海 東莞 順德 中山 新會 台山 開平 恩平 寶安 赤溪 花縣 從化 增城 三水共十五縣 設一行政督察專員公署於廣州以治之 第二區轄南雄 曲江 樂昌 始興 仁化 翁源 英德 乳源 連縣 連山 陽山 佛岡 清遠 安化管理局等共十四縣局 其公署設於韶關 第三區轄高要 廣寧 四會 開建 封川 鬱南 新興 羅定 德慶 雲浮 鶴山 高明等十二縣 其公署設於肇慶 第四區轄惠陽 博羅 海豐 陸豐 河源 紫金 新豐 龍門等八縣 其公署設於惠州 第五區轄潮安潮陽 揭陽 澄海 饒平 惠來 普寧 豐順 南澳 汕頭市 及南山管理局等共十一縣市局 其公署設於汕頭 第六區轄梅縣 興甯 五華 平遠 蕉嶺 龍川 連平 和

平 大埔等九縣 設公署於梅縣 第七區轄茂名 電白 化縣 吳川 信宜 廉江 陽江 陽春 及梅菴管理局等九縣局 設公署於梅菴 第八區轄合浦 欽縣 防城 雲山 遂溪 海康 徐聞等七縣 設公署於北海 第九區轄文昌 瓊山 定安 儋縣 澄邁 臨高 樂會 瓊東 崖縣 陵水 萬甯 感恩 昌江 樂東 保亭 白沙等十五縣 設公署於海口 其公署組織 於專員之下 設秘書一人 承審員一人 視察員一人 下分第一二兩科 各設科長一人 科員四人 書記若干人 第一科之經管事務爲總務 卽屬於署內一切事務 第二科經管事務 爲所轄各縣市局與省府間承上轉下之農林 建設 教育 行政一切事務 全署經費每月二千元至三千元 所有各區專員人選 已由省府主席黃慕松選定曾憲（范其務代理）李磊夫 胡銘藻 林友松 傅疆 周景臻 吳飛 黃公柱 黃強等 呈經行政院核准派充 將各紛紛走馬上任矣 此廣東新設各區行政督察專員公署之大畧情形也

行政督察專員之設置 自經行政院根據內政部所擬草案 於本年三月第二三五次院會中 通過一種行政督察專員公署組織暫行條例頒行後 各省次第遵辦 前有浙江安徽江西湖北福建河南陝西甘肅四川貴州及江蘇山東湖南諸省 今加廣東 殆已成爲新官制之一種 今欲研究此制度之利害得失 不得不先述其沿革

考之清制 州縣之上 有府道介於其間 以達於督撫 至革命後而始廢之 然民國初年 復有道尹之設 原欲以溝通上下 便利行政 顧以徒擁虛名 毫無實權 祇公文上多一承轉 而絕無補於一省之治績 故旋又裁撤 但吾國以地大故 名爲一省者 其範圍等於歐洲一國而有餘 其下所轄之縣 多者逾百 少亦數十 以每省僅一行政首領 而欲其對於多數之縣 一一能實行監督而指揮之 在勢爲萬無得當 但若任各縣好自爲之 則父母之官 豈易得百里之才 不幸而有不肖者蝨於其間 以禍吾民 則又省政之玷 而長官之差也 於此而欲有以寄耳目 通上下 安得不另設一新機構以專司之 而爲政者則於最近數年間 固已試行種種制度 以求其是矣 其在軍事當局督師剿匪之初 以爲欲建大功 非併黨政軍三大權而爲一 另設一機關以當其衝 決不足以整理地方 刷新庶政 爰於十九年十一月第三屆中央執行委員會第四次全體會議 決議於剿匪區域之必要地區 特許設置臨時之總指揮機關 以收黨政軍三方統籌併辦之效果 中央政治會議 根據四中全會之決議案 在第二五二次會議中 議決執行中央決議案 其具體辦法 係在清剿匪共之區域 (一) 由陸海空軍總司令 部設置行營 指揮一切部隊 (二) 由國民政府訓令各省政府 關於政務 應接受陸海空軍總司令 部之指揮 (三) 由中央黨部訓令各省黨部關於黨務 接受陸海空軍總司令 部之指揮

處理 自是軍也政也黨也 合三權而爲一矣 當時豫鄂皖三省剿匪總司令部組織大綱第四條有「凡指調豫鄂皖三省勦匪之陸海空軍 均歸總司令節制調遣外 所有該三省黨務及政務事宜 由中央特許 統受其指導辦理之」等語 其權大矣 其後國民政府 又特明令授權豫鄂皖三省總司令蔣中正 及贛閩邊區勦匪總司令何應欽 均特許監督各該區內之黨務及政務 及何應欽在南昌行營主任任內 又擬具草案 呈准中央執行委員會核定 制定江西地方整理委員會條例 由國民政府 公布施行 該會爲整理江西省黨政軍務之臨時特設機關 以三個月爲期 該會職權 最重要者 (一) 計劃并擬定勦匪區域黨務政治軍事之整理方案 發交各機關執行 (二) 審核勦匪區域之黨務政治人員 發交各機關任用 (三) 凡辦理黨務政治軍事不力之人員 經該會調查確實者 得交各主管機關 分別予以處分 觀此可見其對于黨政軍三方面 均得統籌併辦 又在轄區內有用人黜陟大權 皆無須受命于上級機關 其後之督察專員制度 即由此蛻化而來 吾人不可不注意也

據二十四年軍事委員會委員長行營報告 可以考見委員長 二十一年督師江西時 先在總司令部內 設有兩種軍事以外之機關 其一稱黨務委員會 其一稱政務委員會 以與當地之黨部及省政府互相聯絡 其任職人員 亦多彼此兼任 該會之決議案及所擬方案 可呈請總

司令部發交當地各級政府 或其他特殊機關 分別執行 由該會隨時監督其實施之情況 該會並得於必要時 將剿匪區內各省 劃為若干區 派遣專員 分區指導監督 其後因兩會並立 尙未收得切實聯絡效果 遂又合併為一 改組為黨政委員會 附設行營內 旋以黨政委員會 不過一集中機關 其在廣闊匪區內 尙患指導監督 不無鞭長莫及 爰又將轄區主要地點 劃分為若干區 每區設一黨政委員分會 秉承該會命令 統轄若干縣治 凡非黨政分會管轄之地帶 則仍屬省黨部及省政府管轄 但由黨政委員會加以指導 各分會駐在區內各縣中之一縣 分會委員長即兼任所在地之縣長 分會之職員 得兼充委員長所領縣政府之職員 分會得就區內負才望而能辦地方黨務及事務之人 選派若干人為分會參事 備分會之諮詢 并得經委員會之委託 前赴各縣各鄉 實行調查或指導之事務 至分會委員長則在執行一般縣政府之職務外 尙有下列職責 (甲)遵照黨政委員會指導 在所兼領之縣治 首先舉辦主要之黨務政務 并督促區內其他各縣仿辦 (乙)指揮轄區內各縣之保安隊及保衛團 又如對於黨政各項 經分會認為其轄區各縣 或本區與他區有通力合作之必要時 得商同有關之縣區 聯合辦理 此種辦法 先行之江西 計四十餘縣 分爲九區 各設分會 頗著成效 其後迭與長江各省當局協議 推而廣之 遂有偏設行政督察專員之議 其遞嬗變化之

迹 固足供吾人之參考而研究也

上述黨政委員會及其分會 憑藉總司令部無上之威權 無事不可爲 故雖爲不倫不類之組織 亦得發迹江西 以作試驗 其成立之根據 殆恃有十萬橫磨劍 雖以無道行之 猶得橫行天下 其性質本可暫而不可久也 故江西省政府於民國二十年十二月 因勦匪機關之改組 卽已決議將其取消 其取消之誠是也 蓋黨之原質 不能超出國家之外 其起原爲在全體國民中 集其一部份之同一主張者 相與講求一種應時之策畧 故其主義 必應以國利民福爲前提 而非以少數人 可得假借一時之優越地位 及其勢力 攘國家之最高權而私之 更不得以其偶然所見 強奸爲國民全體之公意 否則在其本身 每爲一時利害 恒有自相矛盾之主張 是故忽而容共者 又可忽而剿共 其他今日之所是 至明日而非之 今日之所行 至明日而反之者 尤數見不鮮 此種舉棋不定之政策 雖欲託應付環境以自解乎 而翻雲覆雨之間 所謂國利民福者 已幾被蹂躪盡矣 夫彼之黨義云云 黨綱云云 其內容是否天經地義 顛撲不破 黨中人自尊重之 自奉行之可也 黨外人不能干卿之事也 但若挾一偏之見解 支離之謬說 尙悍然自號于衆曰 以黨治國 則一念之私 害於其政 使憑有一黨證以作進身之階者 皆徼幸雞犬俱昇 而得有所竊據 以廣其謬種之流傳 則如飛蝗蔽天 吾



民之生機盡矣。然在往者，黨部雖橫，尙賴有政治機關與之對立，或者遇有強項吏，猶稍稍有以掣其肘。顧今乃合黨政爲一體，則更可遇事以黨爲護符，干政之不足，繼而包攬一切矣。黨政委員會及其分會假令長此設立，或更推行於贛省以外，則國民黨所標榜之黨治，不將弄假成真，而使黨外人屈服於其下，無從登政治舞台而獻其技乎？故行政督察專員之制，雖由此蠅化而出，而命名不沾黨味，則行政爲國家之事，吾人自不得不細加研究也。

當時除江西設有黨政委員會之外，其在他省，則爲便利行政上之指揮，及厲行清鄉起見，亦各有特殊組織。如在安徽，則因河流山脈語言風俗及交通之隨處不同，爰將全省劃分爲十行政區，如前清之府屬然。各區所轄五六縣不等，如第一區爲懷甯、桐城、潛山、太湖、望江、宿松，第二區爲蕪湖、當塗、繁昌、和縣、含山、無爲，第三區爲合肥、舒鐵、廬江、巢縣、全椒，第四區爲鳳陽、懷遠、定遠、壽縣、鳳台、滁縣、來安，第五區爲六安、英山、霍山、霍邱，第六區爲阜陽、潁上、太和、渦陽、蒙城、亳縣，第七區爲泗縣、五河、盱眙、靈璧、宿縣，第八區爲貴池、青陽、銅陵、石埭、秋浦、東流，第九區爲宣城、南陵、涇縣、甯國、旌德、太平、廣德、郎溪，第十區爲歙縣、休寧、婺源、黟縣、祁門、績溪。又在各區內擇一縣治，令其縣長爲首席縣長以爲各縣表率，而未賦與特殊職權，此一制度也。

江蘇省自二十一年 訂有行政區監督署組織章程 其大要將全省劃為十五行政區 每區設行政區監督一人 其十五區之首縣爲鎮江 江甯 武進 吳縣 上海 松江 嘉定 南通 江都 泰縣 鹽城 淮陰 東海 銅山 宿遷 各該首縣縣長 卽由行政區監督兼領之 監督爲簡任職 對於各縣行文用令 其職權大致如下 (一) 承省政府及主管廳之命 指揮轄區各縣 (二) 撤銷或停止轄區各縣長違法或失當之命令或處分 但須呈報 (三) 考核轄區各縣長之成績 呈請分別懲獎 (四) 得節制調遣轄區各縣警察或保衛隊 (五) 得召集轄區各縣長舉行行政會議 此又一制度也

浙江由省政府制定浙江省縣政督察專員章程 於二十一年五月三十一日公布施行 其章程大致 劃分全省爲十二區 卽杭縣 海甯 吳興 鄞縣 紹興 臨海 蘭谿 衢縣 建德 永嘉 麗水 龍泉 而各以若干縣分隸之 如往日之知府知州然 每區設縣政督察專員一人 由民政廳擇聲望才幹兼備之縣長兼任之 其待遇與江蘇之行政監督畧同 其職權 (一) 每三個月巡視區內各縣一周 將巡視情形 及各縣政治實況 呈報省府 又對於區內之行政計劃 及實施程序 應邀集各縣長及各機關團體 暨有識士紳 擬定綱要 呈省核定 對於區內各縣正在進行事項 應考查之 並加督促與指導 (二) 每四個月召集區內縣長 舉行行政

會議 將議決案呈省核定(二)經省府特委 得調遣指揮區內各縣之軍警團隊 (四)對區內各行政機關及人員 認有應行獎懲者 密呈主管廳核辦

江西於黨政委員會裁撤後 由經熊主席提交省府決議 將全省劃分為十三行政區 每區設一區長官 即兼任駐在地之縣長 其區長官駐在地為南昌 萍鄉 武甯 九江 鄱陽 上饒 臨川 宜黃 吉安 永新 贛縣 甯都 龍南 區長官之職權 (一)綜理轄區內行政保安事宜 (二)指揮監督轄區內各縣保安部隊 水陸公安警察隊及保衛團隊 (三)考核各縣長成績 呈報省府分別懲獎 (四)撤銷或停止轄縣縣長違法或失當之命令與處分 (五)召集各縣舉行行政會議 (六)呈荐秘書主任與保安主任 及委任署員等

以上四省 皆因行政上之需要 各自於省之下 縣之上 另設一機構 以作樞紐 其組織雖不盡同 而其用意則一也 (未完)

殘 局 湖 山 絕 可 憐

十 年 林 燕 故 依 然

酒 旗 畫 角 斜 陽 裏

猶 自 殷 勤 纜 別 船

## 比利時中立問題與歐洲局勢

六榕

近有一震動全歐之大事 即介於法德兩大國之間之比利時霹靂一聲 突然宣布恢復大戰以前之中立政策是也

比利時地不過一萬一千七百餘方里 人不過八百餘萬口 本歐洲西北大陸一小國耳 自一八三〇年 脫荷蘭之羈絆 始成一獨立國 採用君主立憲政體 然以與諸國爲隣 時起疆界之爭 逮一八三九年 由英法德奧俄五國會議 締結倫敦條約 公認爲永久中立國 而至一九一四年德法戰事起 德國竟不顧比已宣布中立 強向假道以攻法 比王惡其無禮 興兵抗之 卒退強敵 而國亦得保 大戰後並割得德國歐本及馬爾美台兩地 自是以來 在外交國防兩方面 曠就法國 近因德國進兵萊茵之刺激 亟求自保之計 爰於十月十五日 由比王親蒞閣議 主張恢復歐戰前之中立政策 願自置身於強隣戰事旋渦之外 且決計充實國防 力圖自衛 謂荷蘭瑞士 皆足爲法 將從事整頓陸軍制度 以作萬一之準備 是日比王演說 一經傳播 歐洲政界 莫不訝其一鳴驚人 而慮有大影響 將波及於全局 蓋以比利時宣布

中立政策 雖屬於一國之自行明定國是 而外交將由此而發生變化 則其前途之趨勢 凡與有關係之國家 自不能不予以深切之注意也

夫中立之效 非可以空言求之 其平日對於軍事國防 毫無準備 誤信我不犯人者 人即未必犯我 因而不求戰而後能守之道 及一旦強隣有事 左右爲難 始起而欲援中立之例 以圖幸免于戰禍 吾未見「臨時抱佛脚」者之果能有效也 觀於曩年日俄之役 我國所處之位 及其所受影響者如何 足爲殷鑒矣 惟職是故 比王乃於宣布中立 同時並亟亟說明比國以充實國防爲急 謂非有實力以作後盾 將無以止隣邦有欲侵入比國 或假道比境 以攻擊第三國之覬覦 卽無以保障西歐和平 而得從事于有效之合作也 其所以主張武裝和平 不外下列理由 (一) 德國已極力重整軍備 意與蘇聯亦已磨刀霍霍 甚至酷愛和平如瑞士者 亦不得不暫時偃文而修武 故比國自不能處於例外 (二) 現代戰術 進展奇速 比爲小國 其受威脅 較任何他國爲甚 (三) 萊茵河沿岸重行設防之後 德國已視該處邊界線 爲未來侵畧行動之根據地 (四) 觀于國際現行條約 近已多被破壞 可見國際安全機構 非復可恃 (五) 某國內亂 在國際上已發生影響 大劫之臨 岌岌不可終日 由上以談 可知比國之從事整軍經武 其意僅在于有備無患 聊以自固吾圉 而非有與他國締結盟約

以求戰則必勝之野心 蓋今者比國所處國際地位 已與一九一四年前無大異 其欲求安全 斷非與他國締結盟約所克有濟 萬一強隣犯邊 必須賴自己力量 單獨足以與之周旋 方能自衛自保 若無抵抗 而空盼盟約上所規定之他助 則遠水不救近火 只貽贖贖之悔耳 比國之所大覺悟者若此 故在國會中 提議步強國之後塵 延長步兵服役期限 由十六個月 加至十八個月 砲隊及工程隊 亦自八個月加至十二個月 並擬將兵力 自中部調往東北部 者 計有第七第八兩團 其第七團駐紮毘近德荷邊境之東部冬格勒城 第八團則駐紮毘連荷 蘭邊界之北部杜爾烏持城 另有步兵九團分駐利愛治城 即東部邊境國防中心之附近地帶 此外南部邊境 駐有步兵三團 西部弗朗特區則駐一團 另有摩託化騎兵三團 留守京城 作爲應援部隊 其布置之周密若此 足見事前早有計劃 非如吾國之應付國難 遇事皆「祇聞雷聲 不見落雨」之比 故有謂比國者此次之決定方針 前於總理齊蘭 及外長斯巴克迭 次演說中 本已洩漏春光 比京輿論 亦早已注意及此 而今乃盡於比王口中道破耳 願歐 洲各國 未能刺得消息于前 至是始震而驚之 人或疑其外交偵探術之疏 而吾則謂與比國 有關係諸大國 其日夕所勾心鬥角者 僅在于彼此大國間之如何拉攏 如何抵制 初不料區 區之比 乃竟橫來一炸彈 而有此意外之緊着也 夫亦足顯比國外交家之心靈手敏 省却許

多旁人干預之嘖叨麻煩矣

比國此舉 其最感痛覺者 莫法國若 蓋法比有同盟之雅 早於一九二〇年訂有軍事協定 今將因此而發生變化 故此消息一達巴黎 各報館多作激昂之論 有謂比國今已在國際事務之安全章中 抹煞其自己 且以其不商諸任何國家 而自解脫其國際條約之桎梏爲責 又有慮及法比同盟之效力既失 法國防務 從此須將瑪奇諾特防線 由比國邊界展至海濱 又有指摘比王演說 對於戰後之整個歐洲制度 不啻加以破壞 而使各國爲求安全而締結之各種協定 同受轟擊 此外又有論及比國之保守中立 以地理形勢而論 雖不及比法同盟之於法有利 但亦相去無幾 蓋若德國一旦破壞中立 而比國得以新式陸軍抗拒之 則其通過比境時間 必較一九一四年爲長 是於德爲不利 而在法國則以脫去同盟關係故 無須兼顧比國 反得從容佈置防務 是其利也 又或言 自本年三月德國廢棄羅迦諾公約 各大國無術以對付之 識者早慮小協商各國中 必有一國中途變志 甚乃牽動協商而致解體者 今乃不幸而先見之於與我爲隣之比國 誠非初料所及 恐受此波動 而波蘭與羅馬尼亞兩國 亦將改其宗旨 則不可不預爲注意也 基上所述 足証法國輿情 對於比國此舉 皆若不勝其疑慮 而在與法蘭西立於反對地位之德國 則以比國法西斯派之萊克斯黨 與弗拉芒民族主

義黨 近已訂約聯合行動 以反對共產主義 蓋自法蘇互助公約成立以後 比國之萊克斯黨 勢力大增 致軍界中人 亦欲改變其從前之軍畧觀念 此爲比國決定恢復戰前中立地位之所由來 其對西歐安全公約之未來談判 將必予以重大影響 又有批評此事 謂世界上中立國之數目愈多 愈足減少牽起戰爭之機會 故直認比國此舉 實於世界和平 有大貢獻 兩國以地位不同之利害相反 故自不免仁者見仁 智者見智也

此外如英國 則已由比國駐英大使 向英外相艾登 述明比王之真意 謂非從此不願擔任任何義務問題 且將仍爲國聯忠實會員 而英國則慮未來之羅迦諾五國會議 或將受其影響 且英與法親 一旦歐洲果有兵事 則英法以梗于比之中立 其飛機不能飛越比境 將失去利用比國空軍根據地 以作穩固偵探處之便益 其他倫敦人士 對於此事 尙持冷靜態度 未作如何十分表示 至於意大利 則有認比國之新態度 足以表明其有意施行近於實際之外交政策 頗與墨索里尼之見地相同 故亦較予以好評 他如羅馬尼亞 則深慮集體安全制度 受其影響 將使以國聯會爲基礎之外交事項 不免發生動搖 捷克輿論 則謂比國既不援助他國 又安望他國予以援助 並言此舉 實足令英法兩國 愈趨于接近云 此又各國對於比王演說內容 所爲推測批論之大致也



今夫歐洲人民 慘受大戰荼毒之教訓 去今未久 大眾苟非善忘 方當痛定思痛 相率以互相殘殺爲戒 殊不料人類不忍人之心 終易爲權利思想所虓服 於是乎有野心家應劫而生 祇緣貪勢好勝 每不以現在所處之地位爲滿足 則往往在國際事理間撫拾一二疑似 故作危詞 以激動民衆敵愾之心 受其惑者 倘又中於感情 失其理性 卽不免如飲狂泉 寧犧牲其性命身家 而亦盲從之 以造就一發縱指示者之功名 而天下之民苦矣 世之講人道主義者 嘗甚惡乎爭城而戰 爭地而戰者爲禍之烈 故曾揭藥和平之主張 且已設一機構以求其實現 此無他 卽今世人所同認爲毫無實效 形同虛設之國聯會是也 夫國聯會之本身 出于禁攻寢兵之高義 倘爲之分子者 果能尊重之 維護之 天下安知不可循此而馴致太平 而奈何面從心違之委蛇其間者 獨不惜操戈入室 以自決其藩籬乎 一旦約束既破 則彼此猜忌之心 紛然雜起 積疑生恨 積恨成仇 勢既至此 恐一時疏於防範 卽難免有被人襲擊之虞 故遂汲汲以警備爲急 觀於各國近來之競修軍事 此其證也 一國首禍 他國又尤而效之 歐洲局面 入今年來 殺機益露 預言家所謂一九之六之難關 猶鄭人之相驚以伯有 故軍事家既磨爪礪牙 爭示猙獰面目以向人 而外交家更欲廣求黨援 藉以制勝 故五花八門 極盡捭闔縱橫之能事 今日訂協約也 明日開會議也 語曰天下本無事 庸人自

擾之 今者各國紛紜之現象 惟當移此語以諷之耳 願以諸大強國竭力拉攏之結果 卒使歐洲國際間 顯然劃兩大分野 其一爲法西斯派 其一卽非法西斯派也 前者以德意爲代表 後者則蘇俄與英法聯爲一氣 彼此之立其政治基礎者 既若冰炭水火 故爭欲吸收其同情于己者以爲聲勢之助 最近於西班牙內亂 此兩派公然爲左右袒 已露骨矣 若至對峙之局既成 則兩雄不能並立 勢必作一殊死鬥而後能消其戾氣 世雖有愛好和平 願爲前次歐洲大戰子遺之黎民而呼籲 願仍無以促窮兵黷武者之一悟 故弱小國家 戚戚然懼大禍之將臨 亦不得不早爲自衛之計 此比利時此次宣言中立政策之動機 當爲各國所共諒 其聲明比國所欲 乃向隣國保證 比國領土 決不用以作侵畧隣國之根據地 且不許侵畧國軍隊通過比國領土 可謂言簡而意賅 不卑不亢矣 於此足見國無大小 無強弱 皆貴有識深慮遠之人 出而主持 務當決一方針 以應付環境 斷不能常取游移不決之態度 誤盡其國 而猶不知有所變計也 吾以是乃佩比王之深沈而勇決

知人者智 自知者明

勝人者有力 自勝者強

（老子語）

## 爲提倡親俄論者進一言

蘭香

中國知識界之受馬克思學說 可謂由蘇俄間接傳來 當列寧與杜洛斯基勢力方盛之時 不  
忘東亞大國有數百兆人民 可供利用 于是先從學校入手 出版品與盧布並行 等于私運  
蓋我國知識階級 方好奇驚新 對於將近百年之共產學說 未之前聞 偶得之 如獲異寶  
自列寧以甘餌蜜言 引得我國革命黨人上鉤 于是使嘉倫鮑羅庭之流 挾學說陰謀軍械盧布  
以俱行 鼓吹暴動與暗殺 遂構成所謂「國共合作」時期 左轉風盛 達半中國矣 其勢如  
火燎原 不可嚮邇 迄于金陵 率被遏于列強之礮聲 毒燄乃稍息 此後遂變爲「國共分家  
」時期 自是以後 國共以鬪爭流血爲常 亘二十餘寒暑 毒痛至十數省 而以江西爲大本  
營 自被驅西走 又將蘇維埃政府 移至甘肅與西康 以期與蘇俄取得聯絡 當此「共匪」  
東突西奔 逃亡無地之今日 法國著作家某氏 猶謂中國共產黨潛勢力 仍佔全國人民三分之  
一 中國仍爲「國共」瓜分神州之局 彼人蒿目吾國共產隱患 有如燭照 而吾國一般識見  
淺短之流 尙有提倡親俄 渴望「國共合作」 聯絡以平等待我之民族 共同奮鬥 庶幾國

事尙有大可爲者 吾故爲此說以闢之

史丹林氏聲稱蘇聯不貪「外國寸土」 莫洛托氏斥責意大利侵畧亞比西尼亞弱小民族爲帝國主義 又大聲疾呼曰「納粹黨人準備打擊 日耳曼尼在文義上 是一武備行營 而危及全歐」 最近蘇俄大使鮑格莫洛夫 在滬招待新聞界談話 爲其國宣傳 有如下詞句「目前國際形勢之發展 實異常不利 戰爭之威脅 已日益迫切 此種不利之發展 主要原因之一 無疑係某某數國及其政府之政策 此種政策 並非如蘇聯之基于世界和平之願望 而係基于企圖領土擴張 及征服其國家與人民」 蓋蘇俄人物之意 凡世界列強之不肯接受其赤化 而其勢力與武力 又足以爲其普羅獨裁制之敵者 彼皆諡之爲帝國主義者也 然若烏格蘭 伊斯尊尼亞 列維亞 賚淺尼亞 以及吾國之外蒙 皆爲蘇俄收爲其蘇維埃聯邦之一員 完全在其主權支配之下 試問此等主義 又是何等主義 侵畧人國之術 有用武力 有用陰謀 有明亦有暗 有烈亦有柔 不過意大利所用者爲武力 蘇俄所用者爲陰謀 意大利所用者爲明 蘇俄所用者爲暗 意大利所用者爲烈 蘇俄所用者爲柔 若蘇俄收烏格蘭 伊斯尊尼亞 列維亞 賚淺尼亞 以及我國外蒙 爲一蘇維埃大聯邦 與意大利并亞比西尼亞 爲一羅馬大帝國 其同爲帝國侵畧主義 有何分別 蘇俄之于人國也 則專暴其惡 而揜

其善 其于己國也 則揜其不善 而着其善 充蘇俄人物之意 似謂世界上祇應有一「蘇俄」 其他強國皆應在打倒之列 而弱小民族 則不打自倒 恰好供爲蘇俄隸屬 爲蘇俄附庸 爲蘇俄傀儡 原來「打倒帝國主義」一標語 內含如許竅妙 如許作用 然在智識粗淺之人 自願儕于弱小民族之列 在此口號呼囂之下 爲蘇俄之應聲蟲則可 若泱泱大國 具有國際知識 不願自儕于弱小民族之列者 亦欲藉此口號 以寓救國之精神 則謬矣

謀人國之術 有以武力者 有以政治者 有以經濟者 有以陰謀者 用武力者 爲攻城之兵 攻城之兵 殺人盈城 殺人盈野 易爲世界所指摘 用陰謀者 爲攻心之兵 如藉共產主義以迷惑人 不耗武力而得利最上 世界亦爲其蒙蔽 故以用武力與用陰謀者較之 用陰謀之謀人國 較用武力者 爲有力而最巧 惟以道德觀念斷之 則用武力者 仍不失爲堂堂之陣 用陰謀者 則不免手段卑劣而可耻 明明侵畧人國家 而美其名 曰平等相待 曰扶持弱小 明明吞滅人國家 而美其名 曰民族自決 曰歸化主義 明明充滿最陰毒 富有挑撥擾亂治安之危險性 而美其名 曰和平之神 曰人道主義 曰神聖農工 凡此種種宣傳種種煙幕 皆蘇俄掛羊頭賣狗肉之策 非極明敏 極方正 極剛毅之人民 鮮不墮其彀中 烏格蘭等邦 及我外蒙 皆陷阱其中 被吞滅于平等待我之種種宣傳名詞下而不悟 維外蒙

與蘇俄 未嘗不平等 但平等之中 俄人全體爲諸葛亮 外蒙人全體爲阿斗 而此諸葛亮 決非爲阿斗而鞠躬盡瘁 但要阿斗供其犧牲耳 吾人欲作外蒙之續則已 如不欲爲外蒙之續 則此等陰謀 當早看破

蘇俄于世界 樹敵已多 尤其是對中國不起 據外蒙 圖新疆 擅賣中東路 皆近十餘年內事 蘇俄既在條文上 承認外蒙爲中國之一部 而事實上 彼煽惑其獨立 實收外蒙爲蘇聯之一員 前既與之成立俄蒙密約 最近又擬與之成立軍事互助 爲外蒙所隸屬之我中央政府 曾不得預聞其事 將我國在外蒙之宗主權 蹂躪已盡 而對我國侵略政策 猶方興未艾 我國土廣而民衆 除外蒙已隸赤旗旗下 尙有西康 青海 新疆 寧夏 或誘以甘言 或恫以勢力 共產主義佔多一部分 蘇俄殖民地即增大一部分 其種種尖銳之進逼 將釀成西北大崩潰之隱患 以新疆一省而論 其土地五倍半于廣東 準廣東一省 養三千餘萬人口 則新疆一省 可容納全中國人口三分之一 如此鉅大犧牲 國人所當怵目警心 如我國與蘇俄共操中東鐵路之所有權 距今不過數年後 蘇俄應以中東路 無賠償而歸還 而彼中途私賣之 不要通知我國一聲 明明媚強欺弱 以平等民族待我者 應如是乎 大辱難洗 隱患方長 國人不應善忘 可乞援而投錯門 認賊作父乎

蘇俄疆土之廣 僅畧遜于英 平均二十人有一方英里 史丹林氏謂不貪外國寸土 似若可信 然觀其對于中國 併外蒙 圖新疆 窺寧夏 誘西康 野心不讓于任何帝國主義者 蓋蘇俄以推行共產主義 征服世界 爲無上之道德 視彼力所能爲 無不乘間抵隙以入 汝從之 則不耗武力而收大效 當然可以和平 不從之 則視爲彼等之敵 當羽毛未豐滿 可以暫時維持友誼 然早或遲 必見決裂 且仍必以武力 盾乎其後 蘇俄代表李維諾夫在國聯提出各國全罷兵備 呼籲和平 議論似乎超人一等 但核其實 不過徒唱高調 彼國以強制勞動結果 不二年 能投十數億金 爲軍事建築 常備百數十萬兵員 千數百萬後備兵 四千架飛機 (拋炸彈者佔四分之一又五) 卽空軍一項 已駕凌美國 次法國而居第二位 設十餘間製毒氣廠 日夜加工配造 期以三年間 更倍其飛機之數 以如此龐大之軍備 足以震驚一世 尙可託爲自衛之謀 無侵畧人國之意 其誰信之 蓋一俟第二五年計劃完全成功 卽漸漸向外 擔負其赤化宣傳工作 挑撥人國階級惡感 使致力鬥爭 傾覆其政府 毀棄其制度 助成其國際革命之功 使全地球皆變爲鮑而西委克之蕃殖地 彼則肆然而爲天下共主 其計謀之毒 慾望之奢 宜爲有國族思想者所厭惡 此所以歐洲法西斯蒂國家 有共同防共壁壘之設置 德國希忒拉氏 有反赤十字軍之倡議也



在太平洋國交討論會 有英國代表吳頓夫人發言 謂「共產主義由蘇俄輸入各國 若各國無需共產主義 俄不能以武力強迫其顧客」 照吳頓夫人之意 是謂共產主義適應某國人民之需求 然後能灌輸入某國 順其自然 則不應阻遏 抑亦不能阻遏 但世界諸國與蘇俄訂約 多有列入條文 要其不向對方宣傳共產主義 未必訂約者 俱是不顧國情 抑徇一部分之利益 蓋國家爲政 對於他國學說主義輸入 當先問利害何如 而需要與否 尙是第二問題 譬如鴉片 但能引誘到一部份人皆吸 或多數人有此癖 則鴉片必變爲必需品 但不論其爲國人必需品與否 惟審知其爲有害于人類之毒物 則嚴禁其入口耳 共產主義以一階級 消滅他階級 無論其犧牲太大 抑亦不合公理 然若煽惑到一部份人願行共產 或多數人有共產癖 則共產主義必變爲必需品 若不禁止之 任其招攬生意 得到「顧客」日衆 不難反客爲主 可以武力強迫人人種 人人製 人人吸 夫朝無賢明之政府 野少剛毅之國民 立國之謨 把持不定 在不遠之將來 必見此景象 吾人對此以如鴉片毒物之共產主義 灌輸我國之惡客 雖不能制服之 戰敗之 獨不能敬鬼神而遠之乎

況我國農業凋敝 一切生產事業 陷于不振 農村公租公之稅加重 水災連年 無地可耕 之民 不得不與凍餒搏鬥 往往流爲盜匪 日益月增 故黨府連年勤共 無些肅清 徐匪尙

前以三千疲敵之卒 甫入川境 卽嘯聚十萬 攻城畧地 勢如破竹 竭劉湘二十餘萬兵力 不得挫其鋒 「野火燒不盡 春風吹又生」 尙未足以喻我國赤化分子萌茁蠶起之易 若一旦藉政府聯俄之勢 軍事經濟 皆取得外資 則彼時赤禍橫流 雖孫吳不能善其後 不辦是非 權輕重 只圖一時快心之舉 以爲求得赤狄保鑣 再作一番投俄冤業 卽無慮作繭自縛 獨不念國家元氣蕩然 已如四摘黃台之瓜 不堪再供國人二次三次國共合作 與國共分家之試驗乎

西班牙自革其國王之命 紀綱不存 變亂疊生 政府則借重俄國 以固其政權 革命黨保王黨則合作 借德義之助 起而攻之 各假名主義而戰 以造成今日空前慘毒流血之大屠殺 實則一方爲蘇俄赤友之傀儡 一方爲法西斯獨裁者所犧牲 屠殺幾許同胞寶貴之性命 毀滅若干可以養生之富財 火併勝負之勢未決 而國家元氣垂盡 抑豈各黨之彥 初衷所料 然或因此而引起世界大戰 其罪尤不可道 作始也簡 將畢也鉅 他日瞰臍 將無及矣 故我國政府 如藩共產主義能適合全國人民心理 能全盤接受者 則親俄聯俄可耳 否則國內有聯俄容共之結果可鑒 國外有西國內戰大屠殺之慘劇足誠 豈可冥行盲動 一誤再誤 蹈人覆轍 擲國運于萬劫不復之地耶

未有知而不行者也  
知而不行只是未知

（王陽明語）



## 外論介紹

### 華北政樂之推移

(一)

(一) 蔣介石之西南統一與華北動搖

(二) 華北政權之變遷

(三) 冀察政權之再認識

(一)

須瀾譯

自蔣介石統一西南 華北遂受重大之刺戟與搖動 於是冀察政權不復能自掩抑而現其灰色的態度 蓋蔣介石西南政策之成功 必將賈其餘勇而有事於華北 此事勢所必至 不待智者而知其然矣 易詞言之 則今之蔣介石已捨棄其從來之姑息政策 將取華北政權以復歸於中央 苟有可以利此目標之進行者 不惜舉其全力以爲嘗試矣 彼無信念之冀察政權主腦部 如委員長宋哲元之流 於是乃有所憚而不敢撓其鋒 從來伺隙而動之南京官僚 又復乘此機

會以從事於反日排滿工作 今日漸趨於表面化矣 雖然 此次華北之搖動 不僅發端於內部也 我當局 將其在華北之中日交涉 悉使之離開華北政權 而向南京政府交涉 亦未始非其原因之一端也 何以言之 彼華北政權之首腦部 向者得對於蔣介石而持有特殊的地位者 則以日本對華北問題 不以中央為交涉對象 且出於強硬的態度以支持之 故彼乃得藉此以代行中央職權 今也 華北問題 既直接向南京交涉矣 則彼等之感覺不安 亦固其宜 雖然 晚近冀察政權內部之複雜 試一讀影佐中佐之談話 亦可窺見其一斑矣 中佐以九月一日歸京 彼以視察滿洲及支那各地所得之結果 向記者述華北最近情事如左

支那中部情勢 視予兩年前在彼勤務時 似無甚差異 惟華北則可為太息者 有二事焉 一則馮玉祥之暗躍 二則藍衣社之潛動是已 馮玉祥以蔣介石之助勢 暗通第三國際以聯蘇俄 此最有害於冀察政權之發達者 而藍衣社又蹂躪梅津何應欽協定 以巧計潛入冀察政權 謀搗亂其內部 以妨害善政之施行 又向華北民衆極盡其離間之能事 華北情形如此 則冀察政權之實現 抑亦談何容易 彼之前途 雖一日亦不能樂觀也 不寧惟是 彼之情勢 如一任其放置 則不特帝國自身之權益有所損 恐於國防上亦貽我以莫大之禍根 故我帝國 亟宜以斷然的決意 以速謀善處 乃為得計耳

由此觀之 則冀察政權之內部 已為蔣氏爪牙所盤據 而彌漫反滿抗日之風氣明矣 彼彼

逐而復潛入之藍衣社 及冀察政權內之南京系官吏 上自委員 下逮僚末 實已公然担当反滿抗日之宣傳與其實際工作 彼等又援助平津各大學教員學生之抗日運動 或則煽動第二十九軍 甚至對於一般勞農大眾 亦悉施以反日侮日之宣傳 其在華北爲中日滿提携之先聲 所謂華北之經濟合作 方將入於具體的階段 而排日貨之空氣 尙依然叫囂於各地 藉取締走私之名 而派遣多數之稅關員吏 此等中央所派員吏 舉動暴戾 行爲又多屬不法 凡屬日本物品 悉以走私者目之 支那人之處理日本物品者 又嚴罰之 假私貨之惡名 動輒爲扣留之處置 以此之故 我日本人之居於平漢線之保定石家莊一帶者 在在而有危險之處 其他 彼之所謂地方官憲者 更有日本人之商於內地者 將予禁絕之之大言驚人 甚至有以對日宣戰 以煽動無知民衆 而激動一時之氣勢 凡此皆冀察內部最近之不穩情態也 不特此也 彼冀察政權本體之宋哲元第二十九軍內部 亦殊有險惡之空氣 其推移亦至堪注目者也 彼其中之一部 有以王克敏之北上 以爲乃日本用以代宋哲元者 此雖爲假想 然彼等自此以後時有密議之召集 以講求對策 而此密議 聞祇准二十九軍之直系者參加 而不許與日本稍有關係者 預聞密勿 席間有對日抵抗之言論 幾乎占全場之優勢 故以保定爲第一綫 石家莊爲第二綫 黃河爲最終綫 全軍退守於河南之說 爲當時最有力之主張

卒以事勢果至此 則平津例在必棄 而持反對論者 其抨擊之也 亦頗示不弱 於是其議遂寢 雖然 自經此密議後 人人皆懷同仇敵愾之心 其不惜出於一戰之犧牲 已浸淫於全軍之中而成爲一時之氣勢矣 觀於以上之事實 則今日之華北 其充滿沉鬱不靖之空氣 抑於此可以見矣

(二)

在過去之華北民衆 爲彼不斷之軍閥鬥爭所犧牲 而苦其苛政 亦久矣 自勝清之亡 此地遂爲軍閥鬥爭之舞臺 其次數殆亦不知凡幾 最初則有袁世凱與南方之抗爭 事因袁世凱欲推倒清室而自爲帝 而南方爲制袁故 則以實施共和制要之 於是兩者之間 衝突以起 及至袁世凱之帝制失敗 北方事實上之權力 遂歸皖系鉅頭段祺瑞之手 自袁之歿以至袁直之戰 中國政治 全由段派主之 迨段派內部發生主戰的南方對策之對立 而不久又以策士徐樹錚之處措失當 遂引起北方派之內訌 至是統率直隸派之曹錕吳佩孚等 乃與奉天派之張作霖結合 而有皖直之戰 結果而皖系失敗矣 繼之北方政局 又復有直奉之抗爭 然自第二次奉直戰後 以馮玉祥之倒戈 吳佩孚慘敗 直系一蹶不振 華北遂爲奉派之天下矣 其事實之現於表面者 姑勿爲之深考 而實際則不外由袁而段而吳而張 其軍閥之分野 則

由皖而直而奉 皆輪掌北京政權 視民衆如敵寇以共其鬥爭者近是 當此時也 人民之痛苦甚矣 故時有咀咒軍閥而欲與偕亡之歎 國民黨乘之而揭打倒軍閥之招牌 以興師於南粵及北伐軍甯漢分裂 北軍又復乘勢南下 此時蔣介石以在野之身 復出任北伐軍總司令之職 率師北上 開蔣、馮、閻三鉅頭會議於開封 誓以戮力完成北伐大業 於時蔣乃率第一集團軍 馮率第二集團軍 閻率第三集團軍 分三路圍攻 第一集團軍既取濟南 遂陷保定 北軍至此遂全潰 張作霖知大勢已去 乃發歸奉通電 塗次爲車所爆炸而慘死於皇姑屯 是後閻錫山卽以首席委員卽真 設臨時政治分會於北京 雖然 華北政局 非至此而遂即安也 不旋踵而打倒新軍閥蔣介石之聲 又復甚囂塵上 則馮玉祥第一二次之反蔣戰 及其後最大規模之馮閻聯合反蔣戰是已 當聯合軍之占領濟南 張發奎之攻陷長河 改組派領袖汪兆銘北來參加擴大會議 政府組織大綱 於焉決定 合閻、馮、西山、廣西各派 以閻爲國民政府主席 汪等爲委員 發成立通電於全國 此時北軍之地位 頗有利於進展之勢 而不知奉天軍之張學良 堅持擁蔣態度 於是北軍遂不能不以敗績聞 而張學良入關 爲華北最大勢力者 以陸海空軍副司令而握中央之實權矣

迨至滿洲國獨立 華北與之爲壤地相接 其意義自然與前者有不同 故自滿洲建國 所謂



華北政局 遂發生重大變化 昭和八年關東軍以支那軍之頑抗 揭反滿抗日之旗以擾亂中滿國境 遂越長城出灤東 一舉而掃蕩之 然原以有不入關之議 故無何復還軍於長城 自後舊東北系之王以哲何柱國等軍隊 伺關東軍之歸也 又復蠢然思動而入於灤東 有時則越境而侵入滿洲國 其擾亂長城一帶 純出於挑戰的態度 我關東軍爲確保長城以維持滿洲國之治安計 遂決計爲徹底的掃蕩 卽向山海關 喜峰口 古北口三面圍攻 一舉而逼平津 卒以設定非戰區訂立停戰協定而罷軍

先是灤東地方 有中日兩軍之衝突 支那軍不利 中央爲防止日本軍之進逼平津 乃以中央政治會議 令段祺瑞推薦之黃郛氏北上 組織北平政務整理委員會 以期敷衍於一時 此委員會 從其目的言之 自然帶所謂親日的色彩 而同時亦所以防止該地方舊政客之蠢動者 此外於非戰區 又任命殷汝耕陶尚銘爲行政督察專員 設立戰區整理委員會 蔣介石一面既成立北平政務整理委員會 而一面又以熱河失陷 華北抗日戰線失敗 歸責於張學良而諷之辭職 以其心腹現任軍政部長之何應欽代之 使之駐平 以統制華北各軍 又派中央直轄軍 憲兵團 協同多數黨員 藍衣社員 使之在華北一帶爲反滿抗日之潛行運動 自是之後 雖亦曾有馮玉祥 吉鴻昌 方振武等西北系之獨立運動 而結果亦以失敗終


同時孫殿英 石友三 劉桂堂等之灰色軍 亦屏息而不敢動 於是因山西 西北 東北各軍之衰息 中央勢力反日益北進 而前此所謂中央特派之憲兵團 藍衣社 黨部等之活動 又日以盛 凡反蔣人物 悉予牽制 暗殺示威 於時爲烈 由是反滿抗日運動以及其他違反停戰協定之事實 遂層出而不窮 我於無可隱忍之間 乃以蔑視停戰協定之精神 提出積極的抗議 而要求彼解消以強化中央勢力爲目的之暴力團體 與乎暗殺事件責任者之免職等 前者則爲河北省藍衣社及國民黨之解散 及爲藍衣社母體之中央憲兵團及駐紮北京中央軍之南下 與乎爲藍衣社指導者北平軍事分會政治訓練處處長曾擴情及憲兵第三團團長蔣考之免職 後者爲河北省政府主席于學忠 天津市長張廷謨之免職 於是于學忠率其五十一軍移駐西北矣 當時又有察哈爾侮日事件之發生 我乃向宋哲元交涉 國民政府即諷宋於交涉前辭職 而以秦德純代理主席 於是此北平政務整理委員會 自始雖藉親日而存在 至此遂大露其弱點而不能解散矣 其原因 則以該會已漸失其統制力 內部又不能統一 勉強而存置之 徒供日本之利用 且當時日本又極盼望華北機關之單純化 不如以同意之形式廢止之 既可以饜日本之望 而此無用長物 亦得什襲而藏 此實爲兩得之道 黃郛以此利害力說於蔣 蔣許之 故此曇花一現之政委員 於此而遂告終焉 雖然我日本亦未嘗無力於其間也

自政委會之解散 國民政府又設立一河北經濟協會以代之 名則爲表示華北經濟合作之誠意 而內實爲浙江財閥北進之先河 期以此而握華北之經濟實權 用以制日本之邁進 此先發制人之計 明眼人早已窺其用心矣

要之華北者 既多年置於軍閥虐政之下 受南京政府之榨取 滿洲國獨立後 又爲反滿抗日陰謀之巢窟 其空氣之惡劣 農民之憔悴困乏 蓋已甚矣 語曰 物極必反 此華北者豈猶未極耶 以故去年十月二十日而有香河之變 彼蓋希望負擔之輕減與民衆之救濟 進而脫離南京政府之虐政而已 而不知自治運動一起 華北各地遂如火之燎於原不可嚮邇 當時南京政府又突然頒佈「銀國有令」 制定強制法幣 停止銀兌換 以銀歸國有 華北反對之聲 甚囂塵上 於是自治運動之氣勢益盛矣 且有宋哲元 商震 山東之韓復榘 綏遠之傅作義 等合流之說 於此時 殷汝耕乃以十一月二十四日樹立冀東防共自治委員會於通州 其宣言

(一) 管轄區域 除停戰協定區域外 包括延慶 龍門 赤城三縣 (二) 外交 軍事 以委員長任之 (三) 所有行政 仍以中國現行法規爲準 (四) 管理一切國家收入 (五) 新政府之組織爲四廳 (教育 建設 財政 民政) 三處 (秘書 外交 保安) 二局 (鐵道 稅務) 浸假而冀東自治政府又告成立矣 華北之自治運動 當時原有華北五省聯省自治之

說 最少河北 察哈爾兩省及北平天津之自治 則固已成爲不可動之形勢 蔣介石憂之 乃遣何應欽協議於宋哲元商震 以十二月十二日成立冀察政務委員會 而以宋哲元爲委員長焉 此華北兩次之自治氣運 又爲蔣介石老獺之對策所撓 僅得名爲冀察政務委員會 而本質則爲蔣政權之派出所 衣其灰色之衣以期敷衍於一時 是可爲浩歎耳 (未完)



## 第二期要目

插圖（六幅）

常談之使命

蒙藏新疆問題圍繞下之中華民國

移民與國力之消長

論政黨之成立

阿比西尼亞帝國之滅亡

冤獄賠償運動之推行

阿皇蒙塵與國聯

公務員扣薪購機

憲法草案

西村博士自識錄

最近國內外大事紀略

# 支那動亂之原因

灌口堯著  
雲將譯

告現在之支那青年



現代支那之情勢 無論在政治的 經濟的以至於社會的 無不紊亂已極 一般民衆之思想 與生活 皆徬徨於歧路而不能安定 求其所謂統一之傾向 則去事實猶遠 夫對文化程度之 低如現代之支那者 而求其有文化的統一 誠不免過於奢望 然而所謂「國家統一」則彼力 竭聲嘶以宣傳以要求者久矣 及一考其最近之思想界 似仍於世界思潮之動向 漠然如秦越 之不相關 其對於自國文化之無自覺無理解 尤令人駭異不置 此真不能不謂之奇怪現象矣 此思想的無自覺與文化的不統一 實爲現代支那苦惱之種 一切政治的動亂之根 且爲支 那沒落之究極原因也 蔣介石及其南京政府 無論如何宣傳「國家統一」之必要 以權力強 制民衆 然既視蔑本來之文化統一 而欲「國家統一」之理想得以實現 無有是處 現代支那 之文化 實無指導原理之可言 豈惟無指導原理 即大體爲決定文化發展方向之中心思想

亦極茫然而不可捉摸 然則思想與文化之不統一既如此 則對於「國家統一」 雖極其宣傳 至於唇焦舌敝 除爲國民黨自己宣傳外 固無何等價值之可言也 由此言之 則支那國家之名義 不過爲一形式的存在而已 究極所謂「何謂支那」之一疑問 抑至今尙依然存在 而要之其爲無統一之國家 實不俟予之喋喋多言矣 支那何爲而不能統一 其復興之道又何在 吾人以爲此種問題 實有考慮之價值者也



孔子曰「溫故而知新」 回顧五千年之支那文化史 則其間當然有可以統一支那之思想 而爲支那民衆所率由之道 換言之 彼支那者 應以其自身之文化傳統爲基礎 而力求其實現 不宜沾沾於外來思想之糟粕以自滿 復興之道 是在於攝取現世界文化之潮流以爲批判原理 發揮其固有之文化傳統而光大之 使之有威力足以廣被於不遺 審如是也 則孫文國民黨所倡導之「三民主義」 以之爲現支那之指導原理 其於復興支那 有如癩之生於胃中 必不能滋生而茁長也 蓋三民主義 實不能認爲支那文化之特質 三民主義 完全爲Democracy Socialism之唾餘 以此淺薄固陋之偽新思想以教育指導民衆 既疏於世界之實情 又乏於批判能力 忘東洋文化之精華 而惟心募力追歐美文化 卒惑於白色人種之煽動而與最

親密應予協力發展東洋文化之日本相敵視 不惜出以排日抗日運動 而究也 則於支那果何益哉 試觀於滿洲、上海兩事變之結果 可以省矣 繼之今茲之華北事變 尤其最近之漢口、北海、上海事件 在中日兩國以彼民族的 文化的有最密切而不可離之關係者 若終以反目抗爭相周旋 則其無益正與前例等耳 且不僅為利益問題已也 東洋兩國之相爭 結果將予歐美之眈眈者以可乘之隙 蘇聯之赤化 亦必將施其毒燄於支那大陸而不已 如此 則支那行將變為國際共管 可以拭目而俟矣 然而支那不省 仍自掘其墓穴 彼之三民主義 實陷支那於滅亡之深淵者也 蓋國家之危機已迫於眉睫 而尚日倡其排日、抗日之論 則三民主義之毒害 可謂極其頑囂之能事 而不可以理喻矣 故彼奉三民主義之國民黨政權 一日存在 則支那之「國家統一」 必不可一日幾求 且恐非陷於滅亡之悲運而不已也 故吾以為改造支那之根本要件 必先改革三民主義與國民黨 或徹底解消之 蓋復興支那之第一義 非指摘三民主義之理論的誤謬 與夫改革國民黨之暴逆政治而不能有功也



三民主義既為破壞全支那民衆之思想與生活之毒藥 又為國民黨所以變化支那使之陷於亡國悲運之元兇大慝 以此之故 則支那之「國家統一」在國民黨之存續期間 此為必無之事



又可斷言矣 今之支那之智識階級與夫青年等 日以改造國家爲事 而獨對於三民主義 則絕不予批判 對於國民黨 則又似漠然無關於痛癢者 此誠爲不可解之現象 抑亦爲改造支那最困難之原因也 最近支那亦有所謂「支那本位文化」之提倡 用以促自國文化之發展矣 然此僅偏於文藝的方面 而未及於文化全般之改革 不特此也 其以「國防文學」之名 以宣傳排日抗日思想 亦殊有力焉 至於共產黨之赤化宣傳 則又極其淋漓盡致之能事 彼之爲支那學生共產黨運動主體之學生聯合會 最近又用人民戰線之新戰術 頗以抗日爲目標而暗事活躍 排日抗日思想 今已以國民黨爲中心而普及於全國矣 而國民黨又復與共產黨妥協提携 似有驅支那入於赤化動亂之漩渦之勢 以此現象觀之 支那滅亡之運 無論何人皆不能不爲之寒心者矣 然而支那之現軍閥與夫國民黨慾壑難填之官僚 皆爲改造支那之最大障礙物 而現支那之軍閥 其大部分則爲國民黨軍閥 故支那改造之基點 首在要改革國民黨或撤銷國民黨 非此不能有功 此則先已述之矣



然則代三民主義共產主義而可以指導支那之思想原理爲何物乎 現代之支那青年對此問題 漠然不關於心 此最可痛之現象也 支那非除三民主義共產主義以外 則無思想 此種見

解 實爲大謬 三民主義共產主義之思想 究其極 不過一種利己主義而已 奪民衆之自由 幸福之一近代的迷信而已 孔子曰「志士仁人 毋求生以害仁 有殺身以成仁」又曰「予一以貫之」 仁之一語 爲孔子統一之思想 救現代支那之思想的混亂與政治的腐敗墮落 彼乃唯一之良藥 孔子之道 實爲支那民衆所應信之宗教 應守之道德 而應學之學問也 舉凡孔子之思想驗之於藝術、宗教、學問等之一切文化 而見之於實行者 悉爲批判統一支那現代文化之原理之基準 視彼所謂三民主義 共產主義 不啻有霄壤之別雲泥之差 蓋孔子實體驗於悲痛動亂之人生 而後表現此種支那文化之特質 而今之支那 乃全忘其祖宗之所遺而棄之 是可痛矣 吾願友邦之支那乎 試一研究孔子之思想 毋使數千年繼繼繩繩延綿不絕之典章文物 遶汝躬而斬之 晚近復活孔子思想之聲 亦似漸騰於人口 然而熱烈之情 尙未逮也 是非以殉教的精神 宣傳孔子思想而普及之 以決定支那現代文化之進行方向 不足以救亡補弊 蓋孔子之思想 實復興支那之唯一原理也 生命也 以孔子之思想爲立腳點 以征復三民主義 擊破共產主義 更以之推倒國民黨 而謀所以復興支那民族 此真現代支那青年所宜有事也

支道林常養數匹馬

或言道人蓄馬不韻

支曰貧道重其神駿

## 對中日交涉所望於蔣介石者

无咎譯

現在之中日交涉 原以促進東亞安定之自然的合理的事態而爲兩國共通之緊要事件 雖蔣介石亦認識此種精神 則交涉結果必將有圓滿解決之一日 此固爲吾人所確信而不稍存疑慮者 其折衝之過程 彼支那以其特有之國情所牽制 自然有相當迂迴曲折之處 此亦爲吾人所想像而得之者 雖然 今之支那 爲蔣介石獨裁之目的物 蔣之權力 無論何人 不能掣肘之 且蔣又爲聰明練達之士 眼光極銳 其鐵腕之廻異尋常 雖視希特拉 墨索里尼 史丹林 亦無遜色 實可稱現代之人豪而有爲之政治家也 對於此次之中日交涉 吾儕甚望其着眼於大局而速奠定兩國之國交 勿徒左顧右盼而坐失時機也

原夫此次之中日交涉 實包涵有兩大種別 其一爲關於調整中日國交之原則的綱要 其一爲解決最近頻發之侮日事件之綱要 前者爲清算支那之抗日政策 且爲促進東亞之和平安定計 用以發展相互之依存關係 而使民族的協力成爲實踐化者也 其後者則純本於國際法之通義 以期各事件之合理的解決 原無所謂無理難題之存於其間 此雖支那當局者亦已於原

則上表示同感 故協定要項而使之見於事實 以求東亞之明朗化 此實爲中日兩國所宜努力以從事之者也

此次之中日交涉 有三種特色而爲其基調 其事實之可以爲精神的背景者 尤不宜以輕視焉 其一 日本對此次交涉 已公然確認蔣介石之現政權 一旦交涉成立 則該政權必將有以使其發展強化 且予以政治的保障 其二 日本已放棄其對華之對立意識 且披瀝其促進中日一元的繁榮之誠意 其三 此次之交涉如果成立 則可以排擊歐美之對華干涉 東亞之獨立保全 由東亞自己擔當之 所謂有劃期的意義者在也 今請分述其要旨如下

第一 自滿洲事變以來 中日兩國 表面上雖仍繼續其國交 而政治的心理的方面 則已發生極度的相尅關係 以具體的言之 彼南京政府則繼續其所謂抗日政策者 而我日本亦復有所謂「打倒蔣介石論」及「南京政府承認取消論」等等 凡此事實 當爲明敏之支那國民所耳聞目見者矣 雖然 此等極端論 固不足以左右我日本之國策 然而支那之執拗的抗日政策 我日本之身受其累者 亦久矣 夫國民的感情至於忍無可忍 則亦不難衍變爲事實之激發 以故千鈞一髮之危機 往往發現於東亞之天地 此真可爲中日兩國之隱憂者矣 果爾 則今次之中日交涉 既公然以蔣介石政權爲對手 以謀中日國交之根本的調整 則從其反面

觀之 是不啻我日本已放棄其「打倒蔣介石論」 「南京政府取消論」 明矣 易詞言之 我日本已承認蔣政權爲名實相符而有責任之中央政府而信用之 在政治的方面可謂已有百八十度之轉回曲折而後出此者矣 蔣氏誠能以我日本之如意雅量爲背景 則其地位必得安定 勢力必得強化 將於延期至來年三月之民國大會 必得當選爲大總統而無疑 由此言之 此次之中日交涉 其有助於蔣氏之地位者甚大 深盼明敏之蔣氏 毋誤認其價值

第二 從來日本之對華政策 原以支那之抗日政策爲轉移 故年來對立意識之低迷而不能相諒 誠爲不可掩之事實 然而今次之中日交涉 則全以大乘的考察以觀東亞現在之情勢 以謀中日兩國之一元的發展 其根本精神 蓋在於是 夫所謂交涉者 乃彼此立於相對的關係之謂 故壓迫支那以獨謀日本之利益 此種思想 絲毫不存 其主意之所在 毋寧謂之爲欲實現支那之安定 促進其建設的改善以爲基礎的要件 因以調整中日國交 具現兩民族之實質的協力者 較爲適當 換言之 我日本之真目的 實欲使兩國民族的依存關係 趨於緊密化 以中日之地理的民族的經濟的要素 團成一片 用以替代從來支那對日之對立關係 以躍進於世界之競爭舞臺 而期將來之優勝者 支那如永遠甘心爲白哲人之半殖民地也 則亦已矣 苟其不然 則爲謀東亞之獨立的繁榮計 對於日本 固無何等反對之理由者存也

第三 由來支那民族的痼疾 最喜弄以夷制夷之政策 每遇有重要之國際交涉 輒望他國援助之 或向第三國以洩漏其交涉內容 僥倖引起萬一之干涉 而每每因此耗其莫大之代價 此等事實 固爲支那國民所常試者也 雖然 今次之中日交涉 斷不容有第三國干涉之餘地 老獐之英國 嘗欲援引九國條約以誘美法合作 然而賢明之美法 或不致爲其所惑 則以現在世界之輿論 對於支那情事 已有一任日本措置之傾向 所以交涉如得圓滿成立 支那有尊重其效果之誠意 則繼今以往 東亞之天地 可以排擊歐美之干涉 凡事皆以中日兩國擔當之 所謂有劃期的意義者是也

由此言之 則此次之中日交涉 實無何等無理難題之存在 且爲支那爲東亞 其收穫的效果固莫大者 聰明俊厲如蔣介石者 自應一審其事態之特質 努力以謀導交涉以入於圓滿解決之域 乃爲得計 自然支那對於日本亦似有相當之要求 惟是最近之中日關係 日本爲被害者 而支那則爲重大之加害者 此次交涉 原欲解決此等被害事件而恢復中日之圓滿關係 故加害者之要求 應暫時擱置之 先行承認日本所提出之綱要 注全力以謀其妥協者爲是

當此時也 支那若仍弄其慣用之遷延政策以宕延時日 或則固執其自己之要求 以阻碍交

涉之進行 則中日關係 或將陷於可悲可驚之事態而不能倖免者 或有之矣 此次日本政府實完全信任蔣政權 其交涉之開始也 亦冒內政上莫大之危險 何也 蓋日本現在對於打倒蔣介石打倒南京政府之國民的感情 尙甚濃厚 以蔣政權爲對手之外交交涉 實有至深之疑懼者在也 若蔣介石不審察此種情勢 漫然以日本之誠意爲可欺而蹂躪之 使交涉終歸於失敗 或發生使人極不滿意之事態 則日本之國論 必翕然一致復趨於打倒蔣介石之一塗 結果非至激發一意外之局面焉而不已也 頃者南京政府所得之日本情報 謂日本決不致出於實力行動 夫國家之責任者 正在外交交涉之當前 而輒談實力行動 此固爲事實之所無者 然若日本國民之對華感情 既日趨於重大而尖銳化矣 則惟有視蔣介石之態度如何 無論政府欲與不欲 而國民之對華意識 必將託於某種之形式而爆發 此則有必然之勢矣 故吾人甚願聰明之蔣介石 小之爲其一身權利害 大之爲東亞全局之和平計而有以善處之耳



### 第 三 期 要 目

#### 插 圖 ( 九 幅 )

蒙 藏 新 疆 問 題 圍 繞 下 之 中 華 民 國

意 阿 戰 爭 後 我 國 之 借 鑑

歡 迎 川 越 大 使 與 中 日 經 濟 提 携

國 聯 無 能 與 阿 國 之 失 望

悼 革 命 大 文 豪 高 爾 基

從 上 海 虬 江 碼 頭 之 建 設 談 到 國 民 經 濟

非 常 時 日 本 之 認 識

對 於 最 近 之 中 日 經 濟 關 係

冀 東 政 權 下 之 華 北 種 種 相

時 事 論 評 ( 五 篇 )

華 北 之 經 濟 調 查

蘇 俄 新 憲 法

最 近 國 內 外 大 事 紀 畧

海 潮 庵 隨 筆



## 時事論評

### 施孝女蒙特赦矣

微波

孝女施劍翹因其父施從濱往年爲軍閥孫傳芳所慘殺，志切復仇已十餘年矣。及去年孫傳芳在天津，孝女追蹤而槍殺之。當時以大仇既報，原欲自殺以從其父於地下。嗣念家有老母，心不忍舍，乃將其母送往南京，而從車站回家。將預作遺書，有所修改，便即向官署自首。其從容就義，膽識殆過于男子。及經法院審判，卒以犯殺人罪，判處徒刑七年。於去年十一月十三日送監執行。於時報上轟傳，論其事者，法律人情，各執一義，言皆有當也。而孝女以求仁得仁，泰然度其獄中生活。據其自述，獄中頗蒙官長優待，日惟讀詩鈔，詩選，詩話，以及新文學等以自遣。嘗於中秋節有感而賦，其詩曰：「同是中秋節，人間兩樣看。萬家齊慶祝，全獄意辛酸。念父心徒痛，思親淚暗彈。可憐今夜月，監裏一見難。」其孝思隨處流

露誠足令人起敬也。近者各學校及民衆團體咸嘉孝女志行，紛然請求政府法外施恩，而軍事委員會副委員長馮玉祥以與孝女叔父施從雲曾共事，從雲於革命時爲國殉難，馮當爲立銅像於北方，以旌其義。今因此一段香火緣，而又哀孝女之遇，因爲聯合中委數人，代爲乞恩於政府。果以十月十四日奉國府明令開，據司法院呈稱施劍翹因其父施從濱曩年爲孫傳芳所慘害，痛切父仇，乘機行刺，並卽時坦然自首聽候懲處，論其殺人行爲，固屬觸犯刑章，而以一女子發於孝思，奮身不顧，其志可哀，其情尤可原。現據各學校及各民衆團體紛請特赦，所有該施劍翹原判徒刑，擬請依法免其執行等情。茲依中華民國訓政時期約法第六十八條之規定，宣告將原判處有期徒刑七年之施劍翹，特予赦免，以示矜卹等語。此令既下，馮玉祥復爲電請宋哲元與天津公安局長程希賢於孝女出獄，妥爲保護。宋爰於二十一日派潘毓桂偕公安局偵緝總隊長楊恩華率便衣探警五十餘人同赴第三監獄，四周佈防以杜意外。是日中午，由孝女乃兄施中良送來男子便衣，乃卽化裝，穿藍袍青褂，戴銅盆呢帽，架墨晶眼鏡，純作男子裝束，以避人耳目。在高等法院推事徐九成監護之下，安然出獄。由探警扶上汽車，潘楊皆隨行，直送至英租界馬廠道其兄中良處暫住。不日便搭中航機飛京省母云。

吾聞之 父母之仇 不共戴天 所謂仇者 當有界說 如因犯法而遭顯戮 死者罪有應得 爲人子女雖飲恨終身 不得誤認爲仇而思報也 惟若憑藉權勢 挾嫌枉殺 則行不義而殺不辜 罪不在於被殺者而在於殺者 倘在法律脩明之時 固不難訴諸法律以求平反 但不幸而遭亂世 則法律不能爲之救濟 往往冤沈莫白 民國以來 屈死于暴力淫威之下者 不知若干人矣 而際此邪說橫行 天性涼薄 墨氏無父之毒 方深中於人心 故今時多見有反顏事仇者矣 問有能不畏強禦 出生入死 手刃父仇 以雪恨者乎 蓋求之鬚眉男子中 尙罕見其人 而今施劍翹獨能以一弱女子 行此驚天動地之事 觀其蓄志十年 不露聲色 智也 行刺孫傳芳後卽欲自戕 繼念老母無依而降志就獄 仁也 割夫婦之愛 斷兒女之情 從容回家取槍而一擊命中 事後復坦然自首 勇也 其若此行爲 雖於法未合 而實爲情理之所許 宜國人之嘉其志 高其義 而咸願盡力 爲之請命於政府而竟得脫其罪也 抑聞施孝女有言 「吾前爲急欲報父仇 曾多次求助于人 而卒無效 現靠自力做去 卻幸成功 可見凡事求人不如求己 推之國事 安知不是如此」 嗚呼 斯言也 吾願爲今之謀人家國者 再三誦之

## 第四期要目

- 插圖十一幅  
讀吳俊升先生從教育觀點論漢字之存廢有感  
所得稅問題之檢討  
美銀政策與我國貨幣問題  
土耳其海峽設防與歐洲局勢  
中國化學工業與國防  
對意經濟制裁之失敗與歐洲政局之動向  
我對華政策之主張  
華北特殊貿易之現狀及其影響  
時事論評六篇  
德意兩法西斯帝國之經濟危機  
蘇俄新憲法  
加藤博士天則百話  
最近國內外大事紀畧  
海潮庵隨筆

## 哀到處被逐之難僑

息夫

我國以國力不競 累及海外僑胞 昔之日月所出沒 皆有華人足跡者 今則到處被逐 天地之大 幾無所容 其從新舊金山暨南洋羣島之來船 每次皆滿載難僑而歸 吾人不管僑務 雖未能得有確實之統計 而試留心新聞紙上所報道 連續不斷 實足令人動魄而驚心 而無從一一爲之縷述而哀之也

最近據路透電稱 紐絲淪沃克蘭地方顧問委員會近申請政府 立即驅逐薩摩島中阿披亞之華工 茲由總理薩法濟答稱 此項問題 並不嚴重 謂俟現有華工合同一年期滿後 不再續訂 則該問題即可解決云 此一事也 又據青島通訊 謂現有難僑十餘人 由煙台來 因無可投止 經巡警就詢 知爲原在海參崴謀生 近乃被逐 其中有一于培財者 年已七十五歲矣 據言二十年前 魯人赴關東謀生者極衆 每人歲中血汗所得 約有二三百金 乃好景不常 自經九一八之變 不得已避地於海參崴 初時每日尙可賺錢兩三元 嗣被共黨佔據後 不但工錢減少 且不許人有私蓄 則原籍各有老家 無以爲養 若囊中稍有餘積 一被搜出

卽認爲犯法而置諸獄 中國人因此陷于囹圄中者 不可以數計 自今年春天始 其待華人尤酷 一切不肯用中國人 有正在工作 突然橫被驅逐 無論金錢行李 概不准攜帶出境 其慘無人理若此 計每日因此而變爲有國難奔 有家難逃者 殆不下數千人 今幸有本國領事 設法將我等送回上海 大率每月兩次 每次約有五百人 及到上海 則以我等原籍山東 又由上海公安局送至煙台 此次同行者共有五十餘人 而烟台紅萬字會 又將我等送來青島 昨日在烟台紅萬字會吃了一頓飯後 至今未再有水漿入口 言次淚隨聲下 狀極可憐云 此又一事也

嗚呼 凡此難僑 孰非同胞 孰非中華民國國民之一分子 使吾國而早發奮自強 以吾僑胞之勤樸耐勞 豈惟到處受人歡迎 且足樹大勢力於海外 何至任人魚肉 被人辱逐哉 然此皆以我政府不能實心實力以保護僑民故 否則中華民國成立之先後 遇事仰仗于華僑之資助者至多 論以德報德之義 黨國要人苟一念及何以有今日 其何忍坐視僑胞之受人酷毒而不之援手耶 顧在國民政府之下 雖爲掩飾耳目計 亦有僑務委員會之設 然數年來成績何在 僑胞之所沾利益爲何 吾恐詰之當局 無以對也 今見難僑之歸國者日加多 而尙未聞當局建一對策 嗚呼 僑將盡矣 務於何有 吾言至此 只有痛心焉耳

## 國民政府之法幣政策

秋聲

國民政府自去年十一月 宣布實行法幣政策以來 轉瞬間已歷一年矣 當局者見國人之戢然就範 方日日自詡其成功 而此法幣之本身 究竟命在何時 吾四萬萬同胞 執此本來不值一文之字紙 以寄其生死 每一試爲念及來日方難 未嘗不不寒而慄也 而國民政府時此一着 則固足以救目前財政之眉急矣

曩者偶有一銀行 對於發行之紙幣 不能兌現 持有之者莫不譁然 而今國民政府悍然行此絕對不兌換政策 乃國民俛首貼耳 未聞有一人起而過問 惟據近者或經調查 謂我國截至目前止 法幣發行總額 已逾十萬萬元 以全國人口比例支配之 人僅占二元有奇 視他國之富力平均 最少十餘元 最多如美國之在千元以上者 誠止嫌其少而未見其多也 顧此法幣發行之保障何在 祇恃此岌岌不能自保之政府 發一紙命令以保障之 則國民黨人對於所言之不能兌現者多矣 安足以令人取信 但國民爲勢所迫 固已盡出其世界所認爲尙有相當價值之銀貨 納諸高深莫測之國庫矣 試問國民黨所把持之政府 豈曾立有萬年有道之基



萬一冰山一倒 吾國民持此空頭支票 將向誰算賬 常言曰 莫名一錢 多是假設之詞 而若至此時 則四萬萬同胞 豈不盡同一運 吾不知「拍手無塵」者之將作何景象也

又聞國民政府據各省市縣政府及農人商民之估計報告 謂現時尙有未經調換之硬幣 約在三十萬萬元以上 隱藏於民間 非囊括而使之淨盡 當局者之意猶未快也 故又網張四面以搜括之 是故其先僅予中央 中國 交通三銀行以發行法幣權 而其後又由財政部特准中國農民銀行發行法幣以一萬萬元為額 其票面分一元五元十元三種 聞已委託德納羅印鈔公司代為印製 不久即可廣布市面 而吸收吾國民所共寶貴之硬幣以去矣 噫 國民政府之法幣政策 噫 財政部之無限權力

附錄 據十月二十日紐約路透電 聯邦儲備銀行 今日宣布撥出共值美金九百七十萬五千元之黃金 歸入外國項下 衆信此必為中國出售白銀之結果

## 聞有發明研究所之設而喜

位觀

發明家有楊明者 昔於民國二十三年 因見糖之消耗極大 合全國營業計之 價在一萬萬元以上 而以本國糖業未發達 大半仰給于外貨 尤以白糖居多 終歲漏卮 爲數至巨 楊君本具發明天才 加以學術研究 亟思改良糖業 乃試就赤糖 加以提煉 使其甜量 較原有赤糖 增加一半 再加入麵粉拌和 使成爲麵粉糖 卒見成功 驗其甜量 足與白糖相等 用途亦無殊異 而成本則較白糖市價 賤至一半 倘果能照此大量製造 不難推銷 其於民食前途 實益不淺 現楊君爲擴大研究起見 特倡設「中國發明研究事務所」 其目的並不限於此一改造糖而止 殆欲徵集全全國工商界之有志發明者聯合加入 以廣事發明 聞其辦法 分作數組 (一) 經濟贊助組 (二) 研究合作組 (三) 各界接洽組 (四) 辦事服務組 (五) 輔助學習組

夫今爲科學競爭之世 其國發明愈多者 其國必強且富 吾國自古本不乏發明家 而以非得之科學之研究 故無統系 無改進 且易於謬傳而失真 故一入於今之科學世界 卽不免

落居人後 至近年始漸有人於此致力者 試繙近來各報所載 此亦一發明 彼亦一發明 其功用大小 雖未盡悉其與歐美各國所發明者 比較如何 而人人知用其心思材力以從事焉 誠一最可喜之現象也 顧欲發明一事物 既賴天才 又需學問 且往往非一朝一夕之功 一手一足之烈 而研究重研究 試驗重試驗 其間無不經過許多曲折 而時間金錢 以及材料人工 由理想而實驗 由小成而大成 何莫非賴有相當資力以接濟之 外國聞人欲有所發明 苦於有志焉而力未逮者 政府或助之 團體或助之 私人亦或助之 無稍吝 且不責以急功近效 嘗有前者仆 而後者猶爲之繼 以此成功者多 而中國則此風氣尙未大開 發明家多視其本人一人之力以將事 親友不譏其迂遠而竊笑者 蓋已寡矣 安望其能資助以成事乎 發明家每有得有端倪 而終以力竭而中輟者多 至可惜也 筆者雖非發明家 而好談發明事 今楊君所倡辦之發明研究所 正區區夙昔所心營目注者 楊君此舉 可謂實獲我心 爲之執鞭 所忻慕焉 更願吾國有志者 共起而扶持之 光大之 前途正未可量也 吾書至此 適又見報載 近有唐宸坤君者已發明一種糧 經將樣品呈由南京衛生署轉發衛生試驗所化驗 認爲不含毒質 惟因所送樣品分量過少 不敷分析 業由財政實業兩部再令其補送大量樣品 以便化驗而得結論云 唐君之所發明者究如何 報上雖語焉不詳 但望文

生義 已足令人健羨不置。當此世界第二大戰將難倖免之時。一旦兵燹既開。其最關勝負之數者。殆莫若糧食問題。往年歐洲大戰時。聞德國已注意日常食料之代用品矣。又吾常觀標題「五十年後之世界」之電影戲。其中亦曾預想將來。可用人工造成一極小粒之食料。服之即可果腹數日。且吾嘗閱荒政書。亦見載有一救飢妙方。今不復能全憶。髣髴是以豆爲主。再合藥蒸晒。甚簡單耳。謂日食數粒。卽足療飢。吾疑其類於仙丹之說。屢欲如法泡製以實驗之。而未果。今吾幸聞唐君之有此大發明。亟望早日得其結論。蓋食爲民天。此問題若果得容易解決。則天下不知少了多少事。是眞人類之大福音也。寄語唐君。其亦與楊君聲應氣求。而相與努力合作乎。

## 第五期要目

插圖六幅

中國財政史之轉捩

所得稅問題之檢討

修改國聯盟約之商榷

西班牙內亂與國際危機

天津工業盛衰之研究

論婦女修養與國家之關係

我日本所望於支那者

世界三大獨裁王之死後問題

華北特殊貿易問題

西南事件與真正統一

大赦政治犯消息

中國科學進步之徵

今日之世界白人之天下乎抑黃人之天下乎

丁祭日國學講經辭

最近國內外大事紀略

# 化妝品漏卮之駭人

沙因

據最近調查 吾國本年截至八月爲止 計全國脂粉香水之輸入 值國幣四十四萬二千四百零三元 牙膏牙粉值二十六萬四千六百二十七元 雪花粉膏值十八萬三千六百零八元 三項化妝品合計 數達國幣九十餘萬云

嗚呼 當今之世 外之則全球人類 方各奮起而爲生計競爭 內之則國難嚴重 正日愁嘆于民窮財盡 惟恐救死不贍 此正吾國男女同胞臥薪嘗胆 埋頭苦幹之時 稍有心肝者宜若不忍以有用之金錢 耗諸無謂之裝飾 而使國富外溢 藉寇兵而資敵糧也 乃今以區區數種化妝品之微 而漏卮之統計若此 寧不可爲痛哭流涕而長太息耶 夫吾人非敢輕量天下女子也 但女子愛好 若出天然 故脂粉向爲女子所專用 證之各國 莫不皆然 則吾國女同胞 近雖力爭平等自由 而以狃于數千年之積習 日事裝飾 未能免俗 亦尙未足深責 惟獨怪昂藏七尺之鬚眉男子 今乃不學王荊公之囚首垢面 以讀詩書 而反效何郎傅粉 甘爲人妖 絲其襪油其頭之不足 甚乃繫其髮作波紋狀 使人遠而望之 迷離撲朔 莫辨雌雄 此

皆浮薄子弟 自炫摩登 而實乃令人見之作三日嘔 然使此輩若是所爲 僅乃自貶人格 則  
糞墻朽木 自可於予無誅 殊不知海關報告 所揭化粧品入口數字之激增 其一部份卽爲此  
輩浪費所致 人方傾其財力 以從事於裝造飛機大砲 伺隙以謀我 而我乃不惜金錢 輸之  
於敵以濟其用 其結果祇博得一副冶容媚態 恐一旦國難臨頭 萬不能恃此乞憐 而可以紓  
其亡國之恨也 卽舍此勿論 而當前以修飾邊幅之細故 坐令國中恃以養命之泉貨 源源外  
溢 苟非陳叔寶全無小肝 諒亦有念此而汗涔涔下 不難爲之一改其度也 吾爲保我國力計  
甚望吾男同胞 不獨相戒絕勿用化粧品 其見女同胞有用之者 且反嫌其有汚顏色 視同  
西子之蒙不潔而避之 則欲以此見好者而反見憎焉 祇在心理一轉移間 而每年數百萬之漏  
卮 卽可塞矣 寧非快事耶 顧或曰 今吾國有位視皇后之最貴婦人 聞購一頸飾 糜費數  
十萬 其平日充御用者 絲襪非數十元一雙者不歡 香水非數十元一罇者不喜 他物類是  
諺曰 城中好高髻 城外高一丈 嗚呼 風行草偃之效 果不誣者 則吾所望挽回八月內喪  
失百萬利權之云云 爲失言矣

# 全國童子軍之成績

釋之

全國童子軍於十月八日 在南京舉行大檢閱 計共到二十三單位 男女服務員一千三百四十人 男女童軍七千五百十五人 都爲八千八百五十五人 是日晨六時卽行開幕禮 由何副會長應欽主席 王理事長世杰致訓詞 徐觀餘司儀 貧兒院奏樂 八時在中央體育館舉行檢閱預演 下午一時男童軍在城內 女童軍在附近鎮市鄉村舉行勞動服務 爲規矩清潔運動及農村衛生運動 同時在教導隊體育場 舉行防空預演 開放營地 任人參觀 晚七時至九時在中央體育場足球場 分區舉行營火會 九日再舉行檢閱預演等 十日以值國慶 上午八時至十一時 在中央體育場舉行檢閱典禮 十一日上午八時行閉幕式 九時開始拔營 其童子軍作品展覽會 另在靈谷寺革命紀念館舉行 任人參觀 連日童軍勤於作業 整齊嚴肅 成績極有可觀 誠空前之盛舉也

考世界童子軍之起源 爲時未久 卽在二十世紀之初 其開山祖爲英國貝登堡將軍 繼而響應者有英法日本諸國 今則殆已普及全球矣 萬國童子軍大會 曾開過四次 參加者不下



四五十國 其發達之程度 可以想見 其在中國 則亦步亦趨 亦已有二十餘年之歷史 惟開辦之始 不過隨人腳根 得其貌似 且各自爲政 號令不一 故皆備員而已 成效殊鮮 近來國人注重 漸加改良 故最初僅由童子軍委員會主管 旋改爲童子軍司令部 現在則組織童子軍總會以主持之 以努力改進之結果 日有起色 遂蔚爲大觀 倘從此自強不息 其能葆民族之健康 作國家之干城 吾將於此是賴 吾聞各國童子軍之有成績可舉者 其在歐洲大戰時 美國則有大批童子軍 能在警察指揮之下 從事於保護鐵路橋樑電線自來水廠等 法國亦有大批童子軍在糧服廠野戰病院及公安交通機關 宣力服務 並維持後方秩序 美國參戰之後 亦賴童子軍搜求製造手榴彈之木材 及推銷巨額之戰債 德國奧國亦有多數童子軍在戰地 擔任通信 及救護工作 由是觀之 足以證明童子軍對於國家社會貢獻之偉大 值此天下紛紛 國家多難 吾望吾全國可愛之童子軍 益加奮勉 以盡天職 而毋甘於落人後也

## 上海講求衛生之兩大組織

思 鄭

吾國遠識之士 自前清末葉 察天下之大勢 懼厄運之將臨 故於提倡保國保教兩義以外 復汲汲于講求保種 蓋以吾國衛生不講 素患文弱 縱無外力相軋 猶恐不足以自強 顧欲藥之 非人人能自加意於攝生不可 苟各個單位不能健全 安望集合而成爲一民族之能得健全乎 但各個單位之求其健全 亦自有道 惜吾國向未之講 即或有自爲一己計 無病時則研究養生 有病時則乞靈藥石者 而能爲大衆健康 想一方便法門 則未之聞也 有之自上海之健康保障會及中國保健社始

保全健康之事業 或可稱爲疾病保險 各國久已盛行此項組織 而吾國獨無 但以我國現在之社會經濟而論 十室九空 平時維持生活 已極感困難 一旦家有病人 醫藥費更苦於無法負擔 以上海普通醫例 恆在一元以上 而藥尙在外 故貧家往往有病而不得就醫 住院更無論矣 以此而喪人之幸福乃至生命 閉目一想 可爲寒心 此不特禍及于個人或家庭 而間接卽令全民族受有莫大之損失 且再就醫學界而言 亦以上述原因 恆使醫師及醫院

俱感營業維持之不易。其結果則直接將使醫師醫院失其服務社會之勇氣。而間接則影響于醫學前途之發展。所關非細也。現欲解決此嚴重問題。惟有聯合醫師醫院。實行大規模之保健組織。一方面集中羣衆之經濟力量。以謀羣衆之醫藥保障。而增進民族之健康。一方面則集中醫師醫院之醫療設備。以增加共同服務羣衆之機會。此誠一舉數善。爲刻不容緩之圖。而今上海既有兩大組織。相繼而起。今爲分述如下。

其一爲健康保障會。係由市立興業信託社主辦。籌備經四月之久。業於十月七日正式開幕。其宗旨在收最經濟合理之會費。徵求市民入會。積極方面。將以種種健康常識。貢獻會員。俾知所以進入健康之路。消極方面。則特聘各著名主要專科醫師。免費爲會員診察。以復其已失之健康。其章程則基本會員年納會費三元。特別會費年納會費十元。會員家屬入會者。祇納半費。均享得免費就診及其他權利。藥費及手術費。亦取之極廉。並定有保產辦法。會員亦得享受優待。現已覓定法租界慕爾鳴路六十五號爲會址。開始徵收會員。

其一爲中國保健社。係由虹橋療養院院長丁惠康博士。於年前奉部令出洋考察時。曾與德國漢堡拿沃公司。即德國最大之社會保險機關。訂立合作條件。於歸國後。即極力提倡。與國內專家。縝密研究。並得前市長張定璠及各方之贊助。已於十月二十七日正式成立。其辦

法爲集中現代一切最新醫療設備 成立全市大規模之醫療服務組織 普及公衆醫藥保障 推  
進預防保健工作 其社員分爲數種 俾各隨其個人環境而納經濟化之社費 一經入社 照章  
享受醫療上種種利益 平均每日納費一分六釐 卽獲全年診察免費 每日納費一角三分 卽  
獲住院及醫療上一切免費 此外尙有預防疾病工作 及免費檢查身體 並對於社員之日常生  
活及一切衛生方法 隨時派員訪問 詳細指導 又爲增進社員健康及調劑生活起見 在郊外  
勝區交通便利地點 特闢郊外俱樂部 並備公共汽車 及一切正當娛樂 如網球場 划船等  
等設備 且可供給膳宿 所費極廉 以資提倡 該社監理人爲李大超潘公展李延安顏福慶陸  
伯鴻等 理事則爲葉公綽張定璠周雍能馮炳南朱少屏江問樵翁之龍朱博泉蔡承新杜重遠汪伯  
奇馬蔭良鄭耀南丁福保丁惠康等 其事務所設在上海靜安寺南大西路愛字二號

## 第六期要目

- 插圖五幅  
採用徵兵制與世界備戰之聯想  
德俄交惡之謎  
中國交通事業進展之一斑  
修改國聯盟約之商榷  
天津工業盛衰之研究  
論婦女與國家之關係  
中日親善以先定其目的與目標為第一義  
關於對華政策之主張  
慶祝孔聖誕感言  
羅馬尼亞親德之推測  
菲律賓華僑又將遭厄運  
德意兩法西斯蒂之經濟危機  
雪浪和尚語錄兩則  
最近國內外大事紀略  
海潮庵隨筆

## 法郎貶值之原因及其影響

巴人

法國勃侖內閣於九月二十五日在國務會議 議決新貨幣法而宣布之 所謂法郎貶值問題 於是遂爲全球所注目 而法國經濟 即以此奠其新基礎

世界貨幣之大別有三 英鎊美元以外 厥惟法郎 勢成鼎足 各有其相當之地位 皆以金爲本位者也 自一九二九年 世界經濟既呈恐慌之現象 於是英美諸國 先後放棄金本位 以貨幣貶值爲爭奪市場之手段 而當時法國之藏金量居世界第二 自以維持金本位爲有利 故不隨英美之後 別與意比荷瑞諸國相結合 於一九三三年 組一歐洲金集團 以維持金本位爲職志 而法國之所以堅持金本位者 尙有下列原因 (一)法國於戰後 因政費過大 通貨膨脹 致法郎價值狂跌 及一九二八年不得已將法郎價值 貶低五分之四 通貨始獲穩定 而民衆已受過一次大損失 故對於貶值政策 反對甚力 (二)法國資本主義之發展 與英美殊異 其金融資本之與產業 關係較疏 因而形成一種食金利的階級 此階級極不願其債權或存款 因貶值而打折扣 故爲支持金本位之台柱 (三)法國在中歐金融市場極占

優勢 一旦貶值 恐因英勢力侵入而動搖 以此諸因 故歷任內閣 均主張維護金本位而貶值問題 直至現在而始解決

此次實行貶值 係因法郎在英磅美元貶價以後 對外匯兌之比價過高 致入超日甚 經濟益形恐慌 黃金之逃匿于外國者有加無已 爲亡羊補牢計 故毅然採用貶值政策 一方面可以攫取國內資金 使之統制於政府 又一方面 則可以刺激物價 開發國內市場 同時並可調節國際物價 阻止資金外溢 減少入超 且以法郎平價減低 法國商品 自亦易於出口 其作用有如此者

至此次法郎貶值 其影響於國際間之貨幣市場者甚大 而於英鎊美元 尤有關係 現在歐洲諸小國 除瑞荷兩國外 其匈土希拉立等國 俱已加入英鎊集團 至捷羅等 或用英鎊或從美元 至今未決 將來必成爲爭取之點 現在英美法 又締結一貨幣協定 其於國際貨幣戰之前途 不知如何 若至我國金融市場 向爲英鎊美元所左右 而於法郎則關係甚淺 故此次法國改制 其影響之及於我者幾希耳

細草穿沙雪半銷 吳宮烟冷水迢迢

梅花竹裏無人見 一夜吹香過石橋



## 專載

### 英國所得稅之內容與沿革

潛翰

我國所得稅 中央已實行開征 於本年十月一日起 先開辦公務員所得稅 此係我國財政史之一新紀元 前途之展望 或認為實行不易 外人未必肯俯首就範 或認為實行雖屬不易 然直接稅已為世界之共同標準良稅 今已開辦 足養成國人之納稅習慣 考世界所得稅之曆史 以英國為最早 而成績之佳 亦以英國為著 正值我國初辦所得稅之會 對英國稅制 稍述其內容與沿革 或足為他山之助乎

#### 一 征收所得稅之根據

我國在君主時代 其租稅之一統觀念 『為普天之下 莫非王土 率土之濱 莫非王臣』 故緣普天下之王土而生之租稅 均為帝王之私產 因而租稅之名稱 為貢為助 其在歐西



最初之租稅觀念 亦認租稅爲君主之私產 故公共收入 居於第一位者 厥爲公產收入 租稅既爲君主之私產 人民其他之所得 自係君主之餘餘 『大夫無私貨』 人民無私產 則所得稅之觀念 自無從發生 中世紀以降 君主與人民 乃立於相對地位 所謂『不出代議士 卽不納租稅』者 其觀念已變爲代議士乃人民之權利 而租稅乃人民之義務 是爲租稅之義務說

租稅既係人民之義務 則人民義務之輕重 應如何而釐定 解釋者至覺紛如 在第一期 可名爲自由主義時代 亦卽法國革命最高潮之時期 其時義務釐訂之標準爲利益說 大致謂 人民從國家方面獲得權利 卽應對國家負擔義務 其義務之多少 與從國家獲得權利之多少 爲正比例 例如從國家檢察機關得到警察之保護 從國家教育機關得到教育之利益 卽應向國家繳納相當之租稅 以爲利益之對價 此種觀念 無殊人民與國家立於交易地位 爾時之所得稅觀念 亦無由發生 何以言之 國家之義務教育 大抵爲貧民設想者多 爲富人設想者少 故公立的教育機關 多爲中小學之教育 微論富人之子弟 入學考試之競爭機會 不及貧民 卽或富人子弟 幸而入學 亦多因其與習慣不諧 或轉而就私立之學校或延師在家 課讀 就全世界之統計 義務教育 恒屏富家子弟於門外 假令租稅理論而爲利益說也 則

富人所享之利益何在 豈非受到義務教育較多之貧民 應對國家完納較多之租稅歟 其他如救貧院養老院恤孤院等 多爲國家所立 豈非貧民老人孤兒應納較多之稅歟 由此一說 富人幾可以全免租稅之義務 違論所得較多 應納較重之稅耶 夫然 故十八世紀之末葉 十九世紀之初期 所得稅理論 亦無由發生 查租稅之利益說 盛行於自由主義時代 爾時政治之學說 爲人類平等 爲個人自由 故利益之租稅說 得在契約論之羽翼下 而生存百餘年 我國近二十餘年中 名義上雖係以黨治國 而事實上整體之租稅理論 均爲接受西方十八世紀自由主義之餘緒 故幾等於人頭稅之鹽稅 行之數十年 恬然而不以爲怪 此直接稅之理論 所以不能發達也

二十世紀中 租稅理論 已由自由主義而進爲社會主義 社會主義之租稅理論 爲能力說 人民對國家之義務 祇問其負擔之能力如何 如能力大者 不問其所得之利益若干 均應負較重之稅 反之則負稅義務較輕 租稅之重心既爲能力 然則能力將何以估計之 又有下列之根據

(一) 爲財產——貧富既分 私產制度既發達 則富者田連阡陌 貧者窮無立錫 夫田連阡陌者 其納稅能力 自比窮無立錫者爲大 於是國家乃征以財產稅 然財產稅之流弊極多

例如有甲乙丙於此 各有屋一楹 其值各萬元 納稅應均等 然而甲稅屋於人 乙自居其屋 丙乃將其屋抵押於人而自居之 其勢必致甲有入息 乙無入息且須負稅 丙則既無入息 且有租稅與利息之兩重負擔 寧得謂平 是財產之不能爲負擔能力之標準既如彼

(二) 爲消費——富者食前方丈 貧者簞食瓢飲 以消費之多寡 而定其納稅額 似可得貧富之平矣 惟一人之收入與消費恒不一致 蓋有富而吝者 又有貧而奢者 如以消費爲能力之準 則富者常有逃稅之虞 况一人之消費 恒有伸縮餘地 賦稅所加 人務節省 則賦稅豈非成爲裁節人民生活程度之工具歟 是消費之不能爲負擔能力之標準又如彼

(三) 爲所得——財產與消費既不能爲能力之準 最合理者 便當以所得爲之 此所得稅之所以能取得現代租稅之主要地位也 一人之所得既多 則積而爲財產者必多 緣而爲消費者亦必多 因所得多寡而賦稅 則具有較優之能力者必無所逃避矣 至何謂所得 所得與能力之關係 當於下節詳之

由前所述 可知所得稅爲歷無數之租稅理論 衍變而來 已成爲租稅之主要系統 苟一國不欲成爲現代之國家則已 如欲成爲現代之國家 其財政命脉 捨所得稅無由 至所得稅能爲戰時財政挹注之源 又爲其特性之一 在產業發達之國家 誠屬財政上之金湯 尤其餘事

耳

## 二 所得之意義

所得爲人之所得也 其義至顯 論其來源 或由智力 編輯人新聞記者之薪俸是也 或由體力 煤鑛內工人之工資是也 或由資本 銀行股東之紅利是也 是所得之爲義 卑之無甚高論 然一究其實際 有非如普通觀念之明白易曉者 欲探究所得爲義 應

一 分別總所得與純所得 譬如有一銀行一間 每年獲利一萬元 此一萬元 其經理與行員之薪水應行扣除 其行址之房租應行扣除 其他之營業開支應行扣除 假定扣除之額爲三千元 則銀行之純利不過爲七千元 而股東祇能就此七千元分派紅利 是一萬元爲總所得 而七千元爲純所得 此係會計學上之問題 而所得稅有其應用

二 應分別純所得與澄餘所得 澄餘所得 爲所得稅獨有之規定 例如上述銀行之股東 共有七人 每人平分該銀行之純所得 各得一千元 此一千元 在甲則須養其父母 養其妻子 在乙則爲獨身者 本身之外 別無扶養之人 則此一千元 對甲之功用甚少 對乙之功用甚大 假令國家同賦以一百元之所得稅 則甲或不免於凍餒 在乙或無損其分毫 是所得稅雖以平均負擔 因能力大小而課稅爲名 而實不免於畸輕畸重矣 (目前中國之所得稅

凡官吏之薪俸 在一定限額者 卽課以一定之稅 其個人之境况如何 在所不問 是依純所得爲課稅標準 立法之落後 無庸爲諱)

現代國家 均採澄餘所得爲納稅標準 故下開費用 不在納課之列

甲 最低限度之生活費用

乙 扶養近親之費用

丙 社會生活必需之費用

以英國現行稅制爲例 英國個人未結婚者 每年得免一百五十鎊 此一百五十鎊卽個人最低之生活費用也 已結婚與妻同居者 得免二百二十五鎊 此二百二十五鎊 卽夫妻二人之最低生活費用也 有子女未滿十六歲 長子免六十鎊 次子以下每人免五十鎊 此六十鎊與五十鎊 卽其扶養人之生活最低限度也(我國大家族制度 尙極普遍 每有一生利之人 負有無數之扶養義務者 所得稅法 竟無免稅之規定 立法之落後 亦無庸諱言) 在純所得中 除去免稅之額 是爲澄餘所得

三 應分別金錢所得與心理所得 金錢所得 卽一般所得之能以財產估計者 心理所得 卽特種所得之僅爲心理之享受 而不能以金錢估算者 例如有屋一楹而自居之 其心廣體胖

之態度 卽爲心理所得 此種心理所得 至難估算 故課征方式 不能在所得稅範圍 而在財產稅範圍

四 勤勞所得與非勤勞所得 工人之工資 官吏之薪俸 此勤勞所得也 銀行股東之紅利 以資本而博資本 此非勤勞所得也 蓋工人或官吏 停其心手 卽無所得 而銀行之股東 雖終日恒歌酣舞 亦無損其紅利之收入 故英相格蘭斯頓 曾稱非勤勞所得爲懶惰所得 雖覺太過 然未始無至理焉 各國之立法例 以英國爲尤然 多重賦非勤勞所得以所得稅 而輕勤勞所得 蓋重人類勞心勞力之收入 以期社會進步也

### 三 稅率

所得稅之稅率 採用累進制度 已爲全世界所從同 所得愈多者 其負稅之能力愈優 而財產之效用愈小 蓋依經濟學上之效用遞減律 最初爲原始效用 最終爲邊際效用 故稅財產於原始效用時宜少 稅於邊際效用時宜大 英國所得稅率 如下

所得額

勤勞所得稅率(每鎊)

財產所得稅率(每鎊)

一百三十鎊

無

無

五百鎊

二先令三便士

三先令

一千鎊

三先令

三先令九便士

一千五百鎊

三先令九便士

四先令六便士

二千鎊

四先令六便士

六先令

二千五百鎊以上

六先令

六先令

由上稅率表 可見稅率全係累進 達二千五百鎊以上者 且勤勞所得與財產所得不歧其稅率焉

所得稅於累進之外 又有所謂附稅者焉 附稅者係所得達到若干之限度以外 一面征收所得稅 一面又征收附稅 以期加高富人之負擔也 英國所得於二千鎊以外 即須征收附稅

一千鎊

附稅

無

初超五百鎊

一先令(每鎊)

次超五百鎊

一先令六便士

三超一千鎊

二先令

四超一千鎊

二先令六便士

五超一千鎊

三先令

六超一千鎊

三先令六便士

七超一千鎊

四先令

八超一千鎊

四先令六便士

由上所述 可見英國稅制之精神 係用累進稅率以增高小富之負擔 用附稅以增加大富之負擔 查英國爲純正之資本主義國家 其社會主義之立法 以此爲最顯焉

#### 四 英國所得稅之沿革

一一九二年—英王理查爲亨利所擄 英民謀捐款以贖之 其時按人民所得之多寡 以爲捐納標準 頗有所得稅之雛形 然因其捐納係出於自願 並無國家之強制力 非近代所得稅之涵義也

一七九八年—英國 William Pitt 爲財政大臣 正式開辦所得稅 規定凡所得年額在一百六十鎊以上者 均須繳納一成爲所得稅 而不動產之修理費 子女之教育費 生命之保險費 以及應付之利息地租等 均可免除 其後因人民欺瞞騙稅 而反對者亦多 遂於一八〇二年廢止 一八〇三年—復征所得稅 其改革之點 有如下述 (一)分人民所得爲五類 土地房屋之



所得爲第一類 地上權之所得爲第二類 公債利息之所得爲第三類 營業之所得爲第四類 薪俸之所得爲第五類 (一)減低稅率爲百分之五 定免稅額爲六十鎊 而對六十鎊以上一百五十鎊以下之所得 減輕稅率 (二)利用課源法 一八〇三年之改革 於一八一六年停止 一八四二年一時 Robert Peel 執政 因減輕關稅 而致國用大減 乃恢復所得稅 其改革之點爲 (一)提高免稅額至一百五十鎊 (二)減低稅率 每鎊課七便士 仍分所得爲五種 仍用課源法

一八五三年一時格蘭斯頓執政 力主廢除所得稅 曾揚言：『至於所得稅之廢止 余甚願由我爲之 廢止時機正有待 余尙未完全絕望也』 顧格蘭斯頓雖以廢除所得稅爲職志 然終格蘭斯頓之世 所得稅在英國反發揚光大 其優點大得當時之認識焉

一八七六年一時稅率減低爲千分之八 對於一百鎊以上三百鎊以下之所得 免稅八十鎊 一九〇七年一時改革所得稅之大要爲 (一)仍分所得爲五種 而改革其隸屬之標準 (二)所得稅免稅額爲一百六十鎊 (三)規定所得扣除額 (四)稅率定爲百分之五 (五)分別勤勞所得與非勤勞所得 (六)所得中得扣除保險費

以上所述 俱爲大戰以前 英國所得稅沿革之大致 惟大戰對於英國之所得稅 影響極大

以下復分爲大戰期中之所得稅 與大戰期後之所得稅述之

大戰期中之所得稅 所謂大戰期中者 即一九一四年至一九一八年 大戰既開 英國急急於增加所得稅率 一九一五年 將稅率增加兩倍 隨又增加百分之四十 同時又將免稅限制減低 即戰前所得在一百六十鎊以下者免稅 戰時減低至一百三十鎊 其比較如下表

戰前

所得額（以鎊計）

一六一—四〇〇

四〇一—五〇〇

五〇一—六〇〇

六〇一—七〇〇

減額（以鎊計）

一六一

一五〇

一二〇

七〇

戰時

所得額（以鎊計）

一三一—四〇〇

四〇一—六〇〇

減額（以鎊計）

一二〇

一〇〇

六〇一—七〇〇

七〇

英國戰時於減低免稅額與增加稅率外 又將附稅稅率提高如下表  
所得額（以鎊計）

附稅額

先令

便士

一—二五〇〇

無

二五〇一—三〇〇〇

一

一〇

三〇〇一—四〇〇〇

一

二〇

四〇〇一—五〇〇〇

一

六〇

五〇〇一—六〇〇〇

一

一〇〇

六〇〇一—七〇〇〇

二

二〇〇

七〇〇一—八〇〇〇

二

六〇〇

八〇〇一—九〇〇〇

二

一〇〇〇

九〇〇一—一〇,〇〇〇

三

二〇〇〇

一〇,〇〇〇以外

三

六〇〇〇

## 大戰以後之所得稅

大戰以後 爲英國所得稅之光榮燦爛時期 第一 因大戰之後 國用貧乏 善後之方 在  
在需財 政府不得不謀開源之道 第二 政府雖欲開源 而人民之負擔已重 惟在不加稅之  
限度下 改變稅率 以求增加收入而已

英國於一九一九年 下令設一所得稅改革委員會 專司討論改革所得稅事宜 該委員會有  
會員二十三人 財政專家如璧古教授等 亦列席其中 越時一年 委員會乃草就一報告書  
內容淵深宏博 不特爲英國所得稅改革之先河 抑亦爲英國所得稅最重要之文獻 其依委員  
會之報告書而改革之大端 約如下述

### 差別

財產所得與勤勞所得分立 始於一九〇七年 所得稅委員會之意見 認爲此種制度 對小  
額財產之所得 壓迫太重 其相差應當減少 而勤勞所得在二千鎊以下者 許以差別之權利  
因委員會之建議 故英國一九二〇財政法案之第十六條 有下列之規定 凡勤勞所得 得  
減少十分之一計算 惟因此而減少者 每人不得超過二百鎊

### 免稅限制

委員會又建議 凡一人之所得 均自勤勞而來者 其免稅限制當如下  
獨身者一百五十鎊

結婚而無子女者二百五十鎊

結婚而有子女一人者二百九十鎊

結婚而有子女二人者三百二十鎊

結婚而有子女三人者三百五十鎊 此外子女每增一人 免稅亦增三十鎊

右開限制如其人有一部為財產所得者 其免稅限制亦稍低 其比例為十與九 委員會之建議 亦為一九二〇年財政法案所採用

餘如累進稅率 逐漸施行 人壽保險費得予免除等 均為委員會之建議焉

#### 五 英國現行之所得稅

英國現行之所得稅 以自然人或法人之全部所得為客體 但為課稅便利計 分所得為五種 至課稅標準 則因所得之種類不同 有依租賃價格者 亦有依實收額者 而課稅方法 或為課源 或為直接課稅 而唯求徵收上獲得其效果 五項分類如下

甲 由土地家屋等所有而生之所得

- 乙 由土地占有而生之所得
- 丙 公債公司債之利息所得
- 丁 工商業所得及其他所得
- 戊 薪俸所得

英國所得稅之稅率 既係每年由財政法案通過一次 故稅率時有更動 茲再就日本沙見三郎等所著之各國所得稅制度一書所列一九一三年至一九三二年之稅率表 以見其沿革焉

年度	每一鎊	百分率
一九一三—一九一四	一先二便	五·八四%
一九一四—一九一五	一先三便	六·二五%
一九一五—一九一六	二先六便	二二·五〇%
一九一六—一九一八	五先令	二五·〇〇%
一九一八—一九二二	六先令	三〇·〇〇%
一九二二—一九二三	五先令	二五·〇〇%
一九二三—一九二五	四先六便	二二·五〇%

一九二五—一九三〇	四先令	二〇·〇〇%
一九三〇—一九三一	四先六便	二二·五〇%
一九三一—一九三二	五先令	二五·〇〇%

### 結論

綜觀英國之所得稅 可得三個特徵 (一) 爲尊重其傳統政策而採行分類稅則主義 查英國稅則之分類 近年以來 雖有所改動 然所謂五項稅則 歷久不替 非因分類完善 純爲歷史上之理由 (二) 爲征稅多在源頭 名爲課源法 例如官吏薪俸 即由發薪者先行扣交 政府 與美國之採用申報法者殊科 此係英國稅制 自成系統之一徵 (三) 英國所得稅率 每年通過一次 否則二三年即行通過一次 故英國之稅制 有因時制宜之利 然其煩複混雜 世界國家 無與倫比 此又英國稅制之一特徵也

君子之於學也 務爲道 爲道必求

知古 知古明道 而復履之以身

施之於事 而又見於文章 而發之

以信後世 (歐陽修語)



# 談叢

## 讀史隨記

牛 郎

羅馬皇帝馬爾加士安敦尼之德行 歷史之所稱道者多矣 其尤著者 在勤與嚴 年甫十二 奉斯多噶派之教希臘哲學之一種 即其平生所服膺者 曰以精神克肉體 以天理克人欲 德之外無善 不德之外無惡 嘗在軍中 錄其心得 以成一書 觀其教誨之語 切切惻惻 毫不似帝王之矜嚴 凡帝一生行爲 直是芝諾氏斯多噶派之祖訓言之好注脚也 蓋其自責嚴 責人則寬 而欲盡正義仁愛以濟天下億兆 可不謂賢乎 戰乃其最所不欲也 然不已而戰 則躬親臨陣 暴露于多惱武之濱 經八寒暑之久 與士卒同甘苦 竟獲病崩 崩後百年 百姓思慕不已 往往奉置其像於家廟以祀之云

讀史氏曰 吾嘗聞羅馬有一賢主焉 即皇帝馬爾加士安敦尼是也 帝之盛德 頗似中國禹



湯文武之諸君 而其所著書 亦往往有與孔子論語相出入之處 而西人不甚稱揚其人者何也 蓋以帝不好耶穌教耳 雖不好耶穌教 而道德之盛 則有不必於耶穌教中稱曰聖賢者 由是觀之 泰西道德家 耶穌教以外 豈爲無人哉

兵力之用 視乎國之大小 國愈大而兵愈有用矣 嘗一政事家爲說曰 無論何國 國中人口百分之一 棄其本業 或爲兵勇 或爲遊民 而國不窮者 未之有也 然則兵固不可過多也 然今有一兵 或恃其膂力 恃其利器 恃其技熟 欲以鎮壓百人之衆 斷不能也 卽欲以百人精兵鎮壓萬人之衆 亦斷不能也 何則 衆寡懸絕 勢不相敵也 然以十萬之兵 則制一千萬之民而有餘矣 以一萬乃至一萬五千之兵 則制全都之民而有餘矣 兵與民之強弱不同使然也 且夫兵者自非使千百人之衆合成一體 而指揮之者亦惟一人焉 則雖有韜略之才 訓練之精 亦無所用之 故將之多 非用兵之道也 卒之分 亦非用兵之道也

讀史氏曰 吉朋氏此言 卽爲叙羅馬帝國軍隊政治之事 而發其端者也 夫帝國建設以來 未幾 野心家興 輒藉於僅僅數萬之兵 易置帝王 如奕棋然 不知其能致此者何耶 今吉朋氏解釋之曰 兵民強弱不同 自有一定之數也 以上所論卽是也 抑國家養兵 本爲內鎮其亂外禦其侮而設 今乃欲脅國民以篡神器 是私國家之兵也 昔董卓脅漢君臣遷

都 法國過激黨掌握政權 斬刈生靈 當時民心豈誠服從乎 皆是兵之力也 昔者中國 朝廷不爲董福祥所脅 則亦其不幸中之幸也

昔以該撒之雄才 壞古太士之深慮 猶苦兵之驕悍難馭 西伯拉士帝 雖有勇智 能得而制 狙恩邀賞之兵乎 蓋是時也 兵之驕盈既極矣 而帝更復寵之以被黃金環 許之以與其仇 儼起臥營中 予之以倍前之原餉 養之以一朝有事 則以非常要挾 然後乃肯從事之習 於是將驕卒懈 不可復用矣 帝即覺悟軍險之不可不改革 飭勵一將官 從於其事 而已莫及矣 嗚呼帝而自問 將士懈慢如此 孰任厥咎 則必知責在自己耳

讀史氏曰 西伯拉士帝 使兵娛樂驕盈至於此極 蓋由藉其力以得其位也 夫兵強於內者 必弱於外 虎狼於民者必犬羊於敵 他日帝國衰弱不振 未必不由於此也 所謂兵猶火不戢則焚者 豈必窮兵黷武之謂哉 亦謂其挾戰勝之功 驕而流於弱 悍而難以馭 遂爲國家之蠹賊而已

西伯拉士帝之時 羅馬法學家皆曰 皇帝神聖 在法律之外 不受一切制縛 生殺予奪 唯意所欲 國家則其產業也 帝所以自行亦如之 是以當世之人 俱享昇平 同祝國運昌盛 而後世之人 則謂羅馬衰亡之因 帝所作之也

讀史氏曰 羅馬民政之所以爲民政 以其主權在議院也 行政理財用兵三大主權 一旦移於皇帝 而議院尙得以法律裁制此主權之用 則猶不失爲立憲之政也 今乃至曰皇帝神聖 在法律之外 生殺予奪 唯意所欲 國家則其產業也 則是既純然君權無限之政矣 其衰亡也 不亦宜乎

羅馬及伊大利 在其爲國家中心之時 則自祖先傳來之國民精神 依然猶存 凡將於兵者 無非識文字明道理習法律之士 帝國二百年間 軍隊不失忠順者由此而已 乃及加拉加爾拉帝 變壞憲法 文武始爲二途 自是厥後 凡伊大利附近各省 有教育之士 皆愧爲兵 轉爲文吏 而其爲兵者 皆是蒙昧無知之民 惟知有戰場 不知有國家 知有戰鬥 不知有學術 而訓練紀律 蕩然掃地矣 一國兵力在此輩手 則其顛覆帝位之相繼不絕者 亦不足怪耳

讀史氏曰 國家大患 莫大於士民以兵爲可賤 而不屑從事焉 夫一國之良 在於兵者愈多 則其兵愈精 以向於敵 則不怖敵 以向於民 則不擾民 紀律嚴明 志趣堅確 縱有野心之徒 欲使嗾之以成其私 而兵皆知大義 重國家 不可動以不義也 若頑鈍無知之徒 多在其中 則反是 茲所言者是已 制兵者豈可不知所鑒乎哉



# 最近國內外大事紀畧

記者

## 國內

### 華北中日通航

華北中日通航 經冀察當局與日方簽約後 組織惠通公司辦理其事 由張允榮 兒玉長雄 代表雙方進行籌備 最近已漸就緒 昨據日方消息 已定於十八日實行 惠通總公司設天津 在北平張家口錦州大連 各設辦事處 天津東局子飛行場 已修成可容納大型飛機十數架 之飛機庫應用 此次開闢之航空路 係以天津為中心 卽(一)天津錦州線 每日來回各一班 (二)天津大連線 每星期來回各三班 (三)天津承德線(經過北平及張家口) 每星期來回各三班 各線通航時間及運費 日內可發表 從來天津與日本之交通 若由陸路

經由關外及朝鮮 則須三晝夜 若由海路 則須四晝夜 此次通航後 則天津大連間僅須兩小時 以之與原有之大連福岡綫聯絡 則由天津至日本 可朝發夕至 故日本人對於此次航空路之實現 均欣喜不置云

### 中英航空通航

#### 由滬至倫敦僅需十日

中國航空公司在香港設站 定十一月六日開航 中航機飛港後與明日由港出發之英皇家航空公司飛機班期銜接 直飛新加坡 英倫及中歐各國 十二日內可畢中歐間全程 中航公司總經理戴恩基及副董事長畢士匹 今日同機飛港視察云

### 開發華北將具體化

日軍部前派參謀池田赴東京 向日財閥接洽投資華北 頃池田氏因任務已畢 特於八日由大連搭日機返抵津 池田氏下機後 即赴日租界宮島街日司令官邸晉謁田代報告此行經過 田代於聽取池田氏報告後 即在官邸召集軍部高級幕僚及關係人員開重要會議 另據消息

池田此次返國遊說 結果極爲圓滿 日財閥及一般企業家 多願以全力投資華北以全國策  
所有津石路之修築 白河之疏濬 龍煙鐵礦之開發 與夫一切港灣之改良 均將依次促其實  
現 是項資本除大部分由大藏省供給外 餘均由日財閥加以援手 田代司令決定今明與宋委  
員長協議一切云

## 外蒙與蘇聯當局

### 訂立共同防衛協定

蒙古人民共和國總理兼外長阿摩爾氏 偕同念得少將 前於十月二十八日抵莫斯科以來  
與蘇聯政府首腦重行重要協商 頃據由里加拍來之電訊稱 阿摩爾總理與蘇聯國防人民委  
員長弗洛雪羅夫將軍 及參謀總長厄哥洛夫將軍之間 已成立共同防衛協定 協定內容大約  
如左 (一) 增加蒙古人民共和國軍尤其增加機械化部隊 又由蘇聯將校領導而擴充空軍  
(二) 爲養成蒙古軍將校起見 創設士官學校於赤塔 並於赤塔與蒙古人民共和國首都間  
建設軍用公路 (三) 作與蒙古之共同作戰根據地 而充實赤塔軍事設備

### 張學良聯俄

西安之張學良氏 最近各方曾盛傳其已實行聯俄 茲據自西安來者談 張學良聯俄 刻已實際化 紅線團工作甚緊 舉凡以前劉共有力 及在東北時與日親善之左右 均行遣散 其對張之政策懷有異意者 並加以軟禁 現在西安被軟禁之東北軍人 約二十餘人 餘均被迫返回平津 此外凡張氏管轄下之各機關 多已大批聘用俄籍技術人員 張氏本人一切生活舉動 亦均改常態云

### 綏東各軍雲集

綏省形勢 日益緊張 百靈廟商都兩地之王英李守信兩部及蒙古軍 綜計約四萬餘人 大部已集結竣事 康保方面 並開到有新式武器之軍隊 俟部署竣事 將於本月二十日左右 大舉攻綏云

### 段祺瑞預立遺囑

以八事勸國人

段祺瑞生前預立遺囑三日由其家屬發表 題爲「正道老人遺囑」原文云  
余年已七十餘 一朝怛化 揆諸生寄死歸之理 一切無所縈懷 惟我瞻顧四方 蹙國萬里 民窮財盡 實所痛心 生平不喜多言 往日徙薪曲突之謀 國人或不盡省記 今則本識途之驗 爲將死之鳴 願國人靜聽而力行焉 則余雖死猶生 九原瞑目矣 國雖危弱 必有復興之望 復興之道亦至簡單 勿因我見而輕啟政爭 勿尙空談而不顧實踐 勿興不急之務而浪用民財 勿信過激之說而自搖邦本 講外交者勿忘鞏固國防 司教育者勿忘保存國粹 治家者勿棄固有之禮教 求學者勿爲時尚之紛華 本此八勿以應萬有 所謂自力更生者在此 轉弱爲強者亦在此矣 余生平不事生產 後人宜體我樂道安貧之意 喪葬力崇節儉 殮以居士服 勿以葷腥饋祭 此囑 丙子中秋後五日書於霞飛路正道居

### 財部將再邀內實兩部

#### 商食糧問題

財部定於九日再邀內政實業兩部代表會商食糧問題 該部對食糧運銷已擬具計劃 呈財長孔祥熙核定 使其融會貫通 聯成一系 集中力量 採迅捷有效辦法 俾分頭合作 聯成糧



食網 糧食運銷局成立否 須俟孔財長決定

### 中央撥款五百萬元

#### 充安定桂省金融

桂局救平後 各項善後 亦經次第辦竣 頃查中央財政當局 以該省幣制 向極紊亂 亟應從速整頓 昨特決定飭令該省由十一月一日起 實行改用中央法幣爲本位 原日省毫券改爲輔幣 並規定法幣與毫券比率爲加六（即一元法幣 值桂毫券一元六角） 至於各機關年出經常臨時各費 均照原核定額以法幣八折核發 查桂省府奉命 昨已急電各所屬機關及民衆週知 又據消息 財政部以桂省下月起 已決定以法幣爲本位 爲充實該省現金準備 流通金融起見 昨特撥五百萬元 爲安定流通該省金融基金 聞該款中央昨已過付完竣云

### 冀東教育廳

#### 公布實施教育方針

冀東教育廳頒發教育宗旨一節 由該廳以宣紙製印 分發全區各縣學校 記者以此關係甚

重 茲特採錄於下 以餉關心冀東教育者 (甲) 「教育宗旨」 冀東全區之教育 以發揚固有道德 鍛鍊健全體格 充實國民生計 促進東亞文化爲目的 務期本此目的 以養成優美之道德 尙武之精神 社會之富庶 自治之進展 (乙) 「實施方針」 (一) 普通教育 應根據孝悌忠信禮義廉恥之古訓 陶冶兒童 及青年之德行 並培成其生活技能 俾成自立立人 自治治人之模範人民 (二) 社會教育 應使人民具備科學常識 了解東亞文化 能謀家庭經濟之改善 自治資格之完備 並養成衛生習慣 愛護公物 服務精神 以及敬老恤貧 防災互助 守信愛羣等美德 力反共黨之所爲 (三) 師範教育 爲實現孝悌忠信禮義廉恥之基本教育 應注重人格訓練 同時應注意鍛鍊體格 訓練團體生活 并授以適宜之科學教育 以養成良好健全之師資 (四) 女子教育 以與男子教育平等爲原則 惟須注重養成勤儉之習性 陶冶優良之婦德 以培植完善家庭之根本 而實現賢妻良母之主義 (五) 各級學校 及社會教育 均應一體注意發展國民體育 中學以上授以相當之軍事訓練 養成規律之習慣 爲實施上之必要條件云

### 冀東銀行

### 已正式成立

冀東銀行 自經積極籌備以來 業於日前在通縣鼓樓前冀東銀行總行新址 舉行開幕典禮 首由該行籌備委員報告籌備經過畢 嗣由冀東自治政府殷汝耕長官訓詞 畧謂「冀東銀行之設立 乃除謀行政自治之外 而再圖財政之獨立 蓋自南京政府發行紙幣政策以來 民間僅有之脂膏實質 悉被吸收淨盡 人民所持為金融之憑證者 無非廢紙 一旦政權失倒 豈不告索無門 故本行之成立 乃為穩固冀東以及華北金融之元氣 防杜南京紙幣政策之流毒 進而謀與日滿金融界之互相團結提携 為人民樹一存儲穩靠之機關 本行同人均應本此趣旨 為人民謀幸福 實有厚望焉」云云 繼由日駐屯軍參謀長橋本少將 朝鮮銀行天津支店店長齋藤 分致祝詞畢 當即披讀大連滿裁松岡 及京城朝鮮銀行總裁 新京滿洲中央銀行總裁等之祝電 未由該行趙總經理致答詞 畧謂同人敬聆殷長官之訓示 此後自當秉承長官之誥誡 及來賓之勸勉 努力謀業務之發達增進云云 典禮於焉告成 攝影畢 即假冀東政府內設宴款待 參加來賓計到有中外士紳八十餘名 及平津新聞記者等 席間觥籌交錯 賓主盡歡 直至午後一時始行散會 茲錄該行組織人員芳名於後 (一) 董事池宗墨 張次邁 殷體新 (二) 監事甯哲孫 葉爾衡 (三) 總經理趙從諗 (四) 經理張志遠 江華

## 消彌水患增加生產

### 冀東成立水利委會

冀東防共自治政府水利委員會 於十一日宣告成立 上午十一時三十八分 舉行成立典禮 先由呂金鐸代表副委員長王厦材致詞 謂本會今日成立 一切均注重實事求是 並不舉行任何儀式 旋委員長殷汝耕出席訓話 並由關甯各委員致詞後 卽指定王厦材 張仁齋 趙從懿 殷體新 趙世瑄 孫慶澤 關嘉市 土居丁 呂金鐸 郝浴滄等十一人爲常務委員 並派孫慶澤兼任總務處長 關嘉市暫兼設計處長 趙世瑄兼任工程處長 並報告提議意見二點 一 購置儀器 二 冀東水利實施綱要 下午常務委員會成立 討論一切進行事宜

### 張外長與川越大使

#### 意見接近尙未獲結論

張外長及川越大使 自上月二十六日第六次會談後 以雙方半月來長時間之攷量 及次要人員多次之側面接洽 迄十日下午三時 始於外交官舍爲第七次會晤 繼續交換關於調整中日關係之意見 談話二小時餘 至五時二十分辭出 聞尙未獲結論 惟意見已稍見接近 將

於短時期內 續作第八次會談 據官方發表 我方仍堅持既定方針 會商結論 雙方意見 稍見接近 但尙未獲得結果 將約期再談 又前傳川越擬赴滬一行 將俟會談畧告一段落後 始能成行

## 國 外

### 馬德里陷落

西京之失守 不能即視爲西國內戰之立時將告終止 因政府軍現正堅守其主要堡壘 加太魯尼亞與東海岸一帶之瑪拉迦 瓦倫西亞 巴塞羅納各城市及米諾維與巴斯克兩省 其他如比爾波阿斯都利亞以及沃維都附近之孤懸各地 亦均在政府軍之手也 惟馬德里失陷之結果 德義及葡萄牙 必將立即承認弗哥等所領導之政府云

### 西國民軍如組政府

#### 英法決不予承認

倫敦九日哈瓦斯電 關於西班牙國民軍政府承認問題 官場人士頃宣稱 英法兩國政府業

已決定 馬德里城即使陷落之後 兩國對於西國軍政府 不論在事實上或在法理上 均不予以承認 卽在他日 西國政府亦當採收共同態度 但此際並未成立何項協定云

### 英政府建議

#### 保留海約第二十條

紐約九日路透電 英政府前向美日兩國政府建議保留華盛頓海軍公約之第二十條 卽規定不在太平洋中海軍根據地增固防務者 茲據紐約通報訪員消息 美政府曾於上月杪拒絕此議 美政府聲明此議如與菲律賓濱之中立聯爲一起 或藉以調整遠東整個問題 則美國願作討論 美政府以爲維持該條文未便作爲單獨問題 並說明其拒絕原因之一 與美國遠東政策有關 蓋國務院覺遠東美國之利益須賴易受外交待遇之非侵畧政策保持之 同時且須以充分之海軍力與防禦工程爲保障也

### 羅斯福總統

#### 新財政計劃

政府高級官員今日表示 政府未來財政計劃 擬設法使下屆預算 獲得平衡 至政府財政政策有如下述(一) 明年度經常經費將自一、二五七、〇〇〇、〇〇〇元 減少一四〇、〇〇〇、〇〇〇元 (二) 維持現行捐稅 (三) 減少新借款 (四) 繼續徵收盈餘稅 (五) 中美購銀協定 即將滿期 不再繼續 (六) 繼續國內購銀政策 (七) 繼續世界貨幣穩定政策 (八) 維持平準基金 (九) 總統繼續賦有變更美元金價之權力 (十) 減少三國貨幣協定金準備 藉此減低逾額準備 而促進國內金融穩定 財部官員並稱政府將實施現付政策 而於二年後 減輕國債 惟本年度已知之支出 業已超過財部收入 在政府減輕國債以前 國債有達三五、〇〇〇、〇〇〇、〇〇〇元之可能 財部預計本年度稅收可達六〇〇〇、〇〇〇、〇〇〇元

### 美總統擬發起

#### 國際和平會議

消息靈通人士頃宣稱 羅斯福總統 現正預備一種計畫 用以召集國際會議 討論維持和平辦法 此項會議 若能在美國召集 并擬親自參加 此外 汎美洲和平會議 定於十二月

一日 在阿根廷京城開會 實爲總統所特別重視 蓋欲以美洲各國合作方式 諷示歐洲 俾知所效法也云

### 意相發表重要演說

日前意相黑索里尼在米蘭大教堂廣場演說時 場中爲之擁擠不堪 估計聽衆共有二十五萬人 時時報以熱烈之歡呼聲 致演詞屢爲中斷 當時黑氏演說壇附近立有戎裝之德國代表團 極惹人注目 今日全歐各相邸皆殷切互問曰 歐洲將到何處去乎 首相黑索里尼所發表之重要演說 其內容約可分爲七點

- (一) 意國反對國聯會及集體安全制度
- (二) 說明意大利對法國 瑞士 奧國 南斯拉夫之態度
- (三) 宣佈意大利人民對匈牙利修改和約之要求 表示同情 不久將有以證明之
- (四) 德意兩國提携 不至使歐洲陷於分裂 且將成爲歐洲各國合作之基礎
- (五) 法西斯政府 現當恢復其最初執政時之反共產主義鬥爭
- (六) 向英國方面表示 倫英意兩國 對於保障意國主要利益之一事 不能成立協定 則



歐洲有發生衝突之虞

(七) 宣佈意國 將澈底履行重整陸海空軍備計劃 並將完成其職業團體制度之組織

### 奧國復辟

#### 匈國整軍

據政界人士透露消息 意奧匈三國外長在維也納舉行會議時 似將決定有關中歐局勢之兩項重要問題 卽奧國復辟問題 與匈牙利重整軍備問題是也 按奧國正統派保皇黨領袖魏斯奈博士 日前自維也納來此 聞係就奧國復辟問題 與意國當局有所接洽 又最近首相墨索里尼在米蘭城發表演說 對於匈牙利修改和約之要求 表示同情 似此則意國當在維也納會議中 贊成匈國重整軍備 必無疑義 外長齊亞諾伯爵現定於明日(七日)晚間 率同外交部高級官員數人 前赴維也納 出席三國會談 會後並將赴匈牙利京城一行云

#### 英意商約簽字

英意兩國貿易協定 已於日前由英國駐意大使德魯蒙爵士 及意外相齊亞諾伯爵 在意外

部簽字 將於十一月十六日發生效力 其中規定兩國間商業匯兌 及支付款項之恢復 以及商務與其他債務之逐漸清理 此外更訂明意大利 與英國所有之呆債 共達二百二十五萬鎊之數 應按照原來借款合同 以英金償付 英貨輸入意大利之限額 亦有相當之規定 意人對於此項協定 頗為滿意 並希望兩國關係 因之而見好轉云

## 英國決出全力

### 恢復國聯權威

下議院頃仍繼續開會 當由外相艾登 發表關於外交政策之演說 按上月間 比王利奧波特發表演說 宣佈比國恢復中立政策 嗣後意外長齊亞諾赴德聘問 德意兩國舉行重要談話 最近意相墨素里尼復在未蘭城發表重要演說 國際形勢頗受重大影響 英國政府對於各項主要國際問題 採取何種態度 極為各方所矚目 是則艾登適於此際發表外交演說 其關係重要 自無待贅述矣 就本日艾登在下院演說所得結論 不外以下各端

(一) 英國當盡其最大熱誠 以增強國聯會之威權

(二) 歐洲各項問題 當與各國政府進行談判以謀解決

(三) 希望中日兩國爭端 迅速解決

(四) 英國應重行整飭本國防務

### 德清黨紀念


#### 希特勒演說

今日德元首希特勒 在慕尼黑清黨運動第十三週紀念時發表演說 畧稱 世上除絕對瘋狂之人類外 常無不信國社黨運動之將垂諸永久者 希氏到場時 大受老黨員之歡迎 其演說之場所 即為十三年前 彼向當地長官要求准其清黨 而未蒙許可之同一藏啤酒之地窖中 希氏又稱 德國之新陸軍將於時機臨到時 為祖國而奮鬥犧牲 屆時 舉世之人 皆將見德國之築有文化之堅壘 以阻擋赤色及猶太布爾希維克之狂瀾也 德內長佛立克 已下令全國參加今日之紀念典禮 但忠告人民 勿從事於無價值之娛樂

### 日陸軍省對新預算

#### 決堅持新國防計劃

關於明年度陸軍預算之陸軍與大藏省間折衝 對於不能解決問題 將作政治的解決 以求圓滿解決 陸軍當局以爲預算重點之增強航空兵力及充實駐滿兵備 大藏當局已充分承認其重要性 是以不必憂慮陸軍預算之前途 陸軍對陸軍預算 絕對主張應與庶政一新並行考慮 爲實行庶政一新計 如有必要時 抱有不惜與財政當局協力之意向 但關於新國防充實計劃 並無讓步餘地 陸軍對財政當局決打破向來其消極的財政主義方針 而要望斷行循國運進展之積極的財政政策 以謀國家全體的發展 並本前述方針 擬開始今後折衝云



日夜痛自點檢且不暇

豈有工夫點檢他人

責人密 自治疏矣

可不戒哉

(吳康齋語)



# 雜俎

## 海潮庵隨筆

### 一眼隊

有聞

埃及自古不務遠畧 凡內國之戰爭 外患之防禦 惟面勞苦人土耳其人及亞留馬似兵當其任 農民祇從事耕作 然而勞苦人及亞留馬似人 時有舉叛旗廢太守之積習 埃及欲為國家將來之計 固應廢絕之而別備新軍 一千八百二十二年 埃及王謨罕麥德阿黎 乃布新令普募國民為兵 聘法人使之訓練 于是國人皆嫌惡嫉視 或有抉一目斷一指以免徵集者 阿黎大怒 選一眼者編成一隊 又編手足之畸形者作輕重隊 以懲戒之云

### 長人癖

普魯士王腓利的列維廉 性節儉 質朴而少文 宮中所費 恒不及中人家也 唯有一事 則揮霍異常 一擲千金弗顧 蓋其生平所最好者唯長人 若有身軀奇偉 而爲王所悅者 則不辭勞苦 必得之而後已也 既徵選於境內而不足 又廣求於四方 若有所遇而召之不來 則或以賄賂 或以欺騙 不得則不休也 其所編之長人隊 約有二千四百人 中有長至八尺者 有一意大利人 乃以四萬五千元購得之 亦可見其不惜重資之一端矣 所派募集長人之委員無數 每有因誘拐隣國之人 而起交涉者 而王弗顧也 其所得之長人如此其不易 故愛之如拱珍寶 如撫孤兒 不敢稍拂其意也

### 吸烟議會

腓利的列維廉 更有一事 其兒戲亦類於長人隊者 嘗開一吸烟議會 其議員於臨會之時 必須連吸不止 卽或有暫停片刻者 亦須口含烟管也 而王則於烟氣濛濛之間 高談闊論 以議國家大事

### 君臣鬚

彼得之治俄也 更新百度 一掃從前之積習 易長袖委蛇之服制 并下令除教士之外不得蓄長髯 若有蓄者 則課以罰金 量各人之身家以爲輕重之率 當時其臣下有紐於舊習而不肯奉命者 彼得乃自持剪刀 執其髯而截之 君臣之義 合則留不合則去 若俄廷之鬚者 真可謂之爲君臣鬚矣

## 查理第十二

瑞典王查理第十二 不世之雄主也 與俄彼得同時 當時有北方狂夫之名 歐人又評之爲古今無雙之偉人 少年時縱橫無度 常斬犬羊以試刀 投其首於樓下以驚行人 囿中之畜 殺戮殆盡 此事與晉靈公從樓上彈人頗相似 而兩主之優劣 非可擬矣

## 男性之女王

英王占士 性極怯 見白刃則瑟縮戰慄 常衣厚衣以防刺客之害已 雖盛暑不敢離也 時當 時國人擬之爲女王 其無丈夫氣可知矣



### 帝王與海賊

歷山大王 嘗獲一海賊而鞠之曰 咄 汝卽著名巨匪惡業滿盈之「斯利士」強盜乎 賊應之曰 予乃「斯利士」人 而爲兵者也

王曰咄 汝兵卒也 而盜竊劫掠殺人 爲國家之害 汝之勇氣雖可稱 然汝之行業可惡 汝之罪惡可罰也 賊曰 汝之所言 予都不解 汝今狂呼怒罵者 果何故歟

王曰 汝非犯吾威權 蔑吾命令 擾亂公衆之平和 賊害無辜 以劫奪爲業者乎 賊曰 予今被繫 爲汝之囚人 烹之宰之 唯命是從 雖然 予之精神 固巍然不屈也 願爲大王言之 王曰可

賊曰 予今問汝 汝以何者爲業乎 王曰 朕之業 英雄之事業也 乃當今第一之雄主 絕對之征畧家也

賊曰 汝的名譽 亦嘗聞之矣 然予之猛將勁卒 自問亦可以橫絕地球 然予不屑爲高言也 王曰咄、汝等鼠竊狗偷 舍殺掠之外 復何所長 尙敢妄言以嚇老夫乎 賊曰 試問戰勝者其事云何 亦不過一橫行世界 妨害平和之職業耳 所謂不守法律違背道德 無廉恥以

恣殺戮者非耶 抑予唯以從卒百餘人 出沒於林壑 以爲予之所爲耳 汝乃率數百萬衆 蹂躪四國 剝奪人民 其視予之焚擊村落 打家劫舍 其罪惡爲何如矣 予不幸而生於平民之家 故其事業甚小而難 汝僥倖生而爲帝王 故事業較大而易耳 此汝之所以強於予也 此汝之所以能爲大盜也 然則我兩人之事業 果何別乎 唯有大小之差異而已

王曰 雖然 朕之征伐 不過竄其王而再易之 覆其國而更建之耳 且予於工藝技術哲學商法諸學科 常鼓舞而獎勵之也 賊曰 予亦取富豪者之財物 而分與不自由之窮困者而已 豈有他哉 今汝所說之哲學 余亦知之 雖然 予與汝之所爲 其傷天害理之罪孽 恐永世而不能償也 王默然有間 令從者解其縛而宥其罪

### 木乃術

埃及人尊敬保護死屍之情 可稱世界第一 常人之死也 親戚朋友 相會而議保存之法 其中雖有貧富品位之別 然其方法之大概 第一自鼻拔取其腦 然後以銳石剖割其左腹 去其污物 洗以桃椰酒 實以珍香 復縫其創口 以鹽漬其全身 七十日後 復洗滌之 卷以麻布 以物塗其上 因富而異其金銀五色 中等者約費二三百元 其後便如生人 立之室中 親戚朋友 悲哀而祭 而後送之墓地 其喪祭爲人民之所最重者 是因崇拜祖光之遺靈

因而務保存其死屍 蓋古來「木乃」之術

即保存死屍之法 比醫尤盛云

### 埃及之婚嫁

埃及婦女 天癸之至甚早 故婚嫁亦隨之而早 概在十歲至十五六歲之間 未滿十歲而成婚 亦不以爲奇 十五六歲而爲母 殆一國之風也 故十八九歲而不嫁 則鄉人甚爲詫異 婚姻之法 皆用媒灼 非成婚之日 男女常不見面 而媒灼或親戚爲之執柯 然亦有以媒灼爲業者 既得兩家之承諾 男家須出多少之金 其金額雖因婦之美惡家之貧富不同 然中等家族 約費百五十元左右 夫死之後 非有大故不去 蓋其財產或以一半及三分之一與婦人云

婦人概舉五六子 然下等婦人 所養育者不過二三人 其餘于產出之際 有稍薄弱及形體不具者 悉棄之不顧 蓋一以貧窮不能養育多子 一以爲資質薄弱者 生長亦不能強健而永年 却不如于其初生時棄之 以免他日長成而死 其感傷尤爲慘痛云

夫民別而聽之則愚 合而

聽之則聖 雖有湯武之德

復合於聖之言 (管子語)



## 庭訓格言

訓曰爲臣子者果能盡心體貼君親之意凡事一出於至誠未有不得君親之歡心者昔日

太皇太后駕詣五臺因山路難行乘車不穩朕命備八人煖轎

太皇太后天性仁慈念及校尉請轎步履惟艱因欲易車朕勸請再三

聖意不允朕不得已命轎近隨車行行不數里朕見

聖躬乘車不甚安穩因請乘轎

聖祖母云予已易車矣未知轎在何處焉得卽至朕奏曰轎即在後隨令進前

聖祖母喜極稱朕之背稱贊不已曰車轎細事且道途之間汝誠意無不懇到實爲大孝蓋深愜

聖懷而釋是歡愛之旨也可見凡爲臣子者誠敬存心實心體貼未有不得君親之歡心者也

訓曰朕爲天下君何求而不得現今朕之衣服有多年者並無纖毫之玷裏衣亦不至少汚雖經月服之亦無汗跡此朕天秉之潔淨也若在下之人能如此則凡衣服不可以長久服之乎

訓曰老子曰知足者富又曰知足不辱知止不殆可以長久奈何世人衣不過被體而衣千金之裘猶以爲不足不知鶉衣緇袍者固自若也食不過充腸羅萬錢之食猶以爲不足不知簞食瓢飲者固自樂也朕念及於此恒自知足雖貴爲天子而衣服不過適體富有四海而每日常膳除尙賜外所用肴饌從不兼味此非朕勉強爲之實由天性自然汝等見朕如此儉德其共勉之

訓曰嘗聞明代宮闈之中食御浩繁掖庭宮人幾至數千小有營建動費巨萬今以我朝各宮計之尙不及當日妃嬪一宮之數我朝外廷軍國之需與明代畧相彷彿至於宮闈之服用則一年之用尙不及當日一月之多蓋深念民力維艱國儲至重

祖宗相傳家法勤儉敦樸爲風古人有言以一人治天下不以天下奉一人以此爲訓不敢過也

訓曰冠帽乃元服最尊今或有下賤無知之人將冠帽置之靴鞮一處最不合禮滿洲從來舊規亦最忌也

訓曰如朕爲人上者欲法令之行惟身先之而人自從即如吃煙一節雖不甚關係然火燭之起多由於此故朕時時禁止然朕非不會吃煙幼時在養母家頗善於吃煙今禁人而已用之將何以服

人因而永不用也

訓曰有子曰禮之用和爲貴先王之道斯爲美小大由之有所不行知和而和不以禮節之亦不可行也蓋禮以嚴分而和以通情分嚴則尊卑貴賤不踰情通則是非利害易達齊家治國平天下何一不由於斯

訓曰學問無他惟在存天理去人欲而已天理乃本然之善有生之初天之所賦畀也人欲是有生之後因氣稟之偏動於物縱於情乃人之所爲非人之固有也是故閑邪存誠所以持養天理隄防人欲省察克治所以辨明天理決去人欲若能操存涵養愈精愈密則天理常存而物欲盡去矣訓曰曩者三孽作亂朕料理軍務日昃不遑持心堅定而外則示以暇豫每日出遊景山騎射彼時滿洲兵俱已出征餘者盡係老弱遂有不法之人投帖於景山路旁云今三孽及察哈爾叛亂諸路征討當此危殆之時何心每日出遊景山如此造言生事朕置若罔聞不久三孽及察哈爾俱已勦滅當時朕若稍有疑懼之意則人心搖動或致意外未可知也此皆

上天垂佑

祖宗神明加護令朕能堅心籌畫成此大功國已至甚危而獲復安也自古帝主如朕自幼閱歷艱難者甚少今海內承平迴思前者數年之間如何閱歷轉覺悚然可懼矣古人云居安思危正此之謂

也

訓曰今天下承平朕猶時刻不倦勤修政事前三孽作亂時因朕主見專誠以致成功惟大兵永興崧  
困之際至信息不通朕心憂之現於詞色一日議政王大臣入內議軍旅事奏畢僉出有都統畢  
立克圖獨留向朕云臣觀陛下近日天顏稍有憂色上試思之我朝滿洲兵將若五百人合隊誰  
能抵禦不日永興之師捷音必至陛下獨不觀

太祖

太宗乎爲軍旅之事臣未見眉顰一次皇上若如此則懦怯不及

祖宗矣何必以此爲憂也朕甚是之不日永興捷音果至所以朕從不敢輕量人謂其無知凡人各有識  
見常與諸大臣言但有所知所見卽以奏聞言合乎理朕卽嘉納都統畢立克圖漢仗好且極誠  
誠實人也

訓曰大雨雷霆之際決毋立於大樹下皆老年人時時告誡朕親眼常見汝等記之

訓曰世人皆好逸而惡勞朕心則謂人恒勞而知逸若安於逸則不惟不知逸而遇勞卽不能堪矣故  
易有云天行健君子以自強不息由是觀之聖人以勞爲福以逸爲禍也

(未完)

華北唯一百貨大商店

中原公司

推

銷

中

統

華

辦

國

環

分銷場

北平王府井大街

產

球

貨

品

函售部

價格劃一  
挑選精細  
包裝妥善  
付奉迅速

掛號電碼

中文：六一六五

西文：CENTRALIZE

總店 天津 旭街  
分店 天津法租界 綠牌電車道



常談月刊 第一卷 第七期 民國二十五年十二月一日發行

編輯者 常談月刊社

天津日界福島街  
五十九番地五號

發行者 常談月刊社

本 刊 價 目				
國外每期加郵費一角	國內各埠每期加郵費四分	全 年	半 年	零 售
		十二冊	六 冊	每 冊
		一元八角	九 角	一角五分

廣 告 價 目					
長期刊登價目面議	四分之一	半 面	全 面	地 位	等 級
	二十元	三十五元	六十元	底 外	特 等
	十八元	三十元	五十元	底 裏	優 等
	十五元	二十五元	四十元	正文前後	普 通

天津日本租界旭街

寫並 眞二 機材 械料 河野寫眞機店

電話二〇三二四

振替大連二〇〇九

福通銀號

便期儲蓄存款兩種

(一) 整存便期整付

(二) 零存便期整付

利息比活期優厚

存取比定期便利

天津日租界福島街盛德里對過

電話二二一七七

福通銀號啟